

**ERIRAMYA
LY'OMO NDAGHANO
NYIHYA-NYIHYA**

bisakiirwe
J.C.Choate

World Evangelism Publications
Winona, Mississippi

© Copyright 2001, World Evangelism Publications

Kwayenziwa amaKhophi angu 5000 copies - 2023 - **Lhukonzo**

InDesign Layout: Shane Fisher

Byamabindulhwa omo Lhukonzo
na TALIWABO Bwambale Ezakiel SIKULIMBA Sedrack TALIWABO
Rabson Church of Christ - Kasese Town Kasese Town
P.O. 305, Kasese Tel.: +256774885905

Funded by:

World Evangelism Publications
Winona, MS

Websites:

www.worldevangelismlibrary.org
www.gospelgazette.com
www.worldevangelism.org
www.worldevangelismmedia.com

Ghusome omwatsi ono n'eriyyethya ndeke, soma Bibilia yaghu omo Ndaghano nyihya- nyihya.

Ghukendisuba omo bibuulyo ebiri oko muhiindo w'obuli ky'eryigha. Thukakukokaya busana n'erithwalha eky'eryigha kyino kandi kyibye n'enduundu busana naghu.

Kyehandikawa na balikyethu abe Amerika n'eribindulhwa omo Lhukonzo, Uganda.

Eby'eritsuukiirako.Omukristo akatholera inyaramya Nyamuhanga. Okwenene kuli kuthi abandu abosi bakaliigha ekyi.

Neryo ekyibulyo ekyinene hano, kyirikyithi: Omundu atholere eriramy

athi?

Erisubirya liri lithi thutholere ithwaya omo Ndaghano nyihya-nyihya.

Ebi byothwanzire erikolha omo by'eryigha ebi. Wamasoma nethu eby'eryigha ebi, ghukendiminya eriramyanya eryo Nyamuhanga akasonda okwithwe.

Nyamuhanga abirithuha ekyiinywa kyiwe kandi omo kyiinywa ekyo abiri bisuulha erisonda lyiwe.

Ekyi ni kwenene, kwangabya inikyo kwenene omughulhu Nyamuhanga akakanaya nethu oko mwatsi owakwamene n'endekatheka y'omulhamu, ekanisa, emibere y'Omukristo, kutse eriramyanya.

Neryo ngoko abirithuha ekyiinywa ekyi ni kyighumerera busana n'abandu abosi, n'ekyiinywa ekyo kikabisulha eriyisunza eri righuma oko mundo mughuma noko bandu bosu, kandi omwami mukulhu akakolha oku bukoni bughuma (obukoni bw'ebibi) kandi busana n'obubalya bughuma bw'obukoni obo (Engulhu Yowene ya Kristo), kandi kusangwa iyo akalhamaya abosi abakamolhobera omo Ngulhu Yowene, akathomekera abakamwolhobera b'oko Knaisa yiwe, neryo ibikiriirirya omo musiiendo iwan'oyo bakalhaghirawa erimuramyanya, kyangalhangirika kyithi Nyamuhanga asondire abandu abosi bamuramaye omo musiiendo mughuma kandi ni kwenene kw'asondire athya.

Hakatholera ihabya eriramyanya lighuma omo kyihugho munabwire kandi eryo musindo owo Nyamuhanga abiribiisulha erilhwa omo kyinywa kyiwe .Hangenabya emanya minene eyeriryamiryamo neryo yitholere iyikaramaya omu musindo mughuma.

Omo bindi biinywa, kutse ekyo thukaminyiisaya, omundu amaghenda omwamwanya mughuma weriramiryamo atholere inyeya eriramyanya lighuma. Niikwa, sikobiri bithya omukihogho ; Ghukeghaya abandi ibakaramaya omwa musindo owathe ngowabandi.

Neryo ibwa byamabya kobiri bithya, nindi oyohikire kandi nindi oyothahikire?

Neryo aho amasako atholere iniasomesibwa. Thwanginaminyanya omusindo owo Nyamuanga akayisunza erimuramyamo thwamasuba omwa kyiinywa kiwe. Thwamaminyanya ebya'thwanzireko, thutholere eribyolhobera , kandi thwameya omundu kutse abandu bangyi abakaramaya Nyamuhanga omwa musindo owathiyisunza, thutholere eribahulha mu baramya bamabehi.

Ekyerireberyko, thukasoma omwa kitabu kya emibiri yabakwenda 17 ahabya abundu be Atena babya bakaramaya omubuthaminyanya.

Kandi Nyamuhanga mwabuugha athi hane abakamuramaya buyira kusangwa bakakangirira ebihano bya'bandu nga nibihano bya Nyamuhanga.

Ekyi kyikabya kwenene thukababwira kandi hali eriramyā eryo musindo owahikire ni eriramyā eryomusindo owathahikire, neryo eyo nimibere eyo abandu bakaramayamo.

Enzumwa engulhu omo by'eryigha bino, ly'eryigha omusindo mughuma ow'okwenene owatholere eriramiryamo Nyamuhanga kandi erilhangira thuthi thukaramaya thutya. Thwamakolha thutya, ithukendibya n'eriyikethera thuthi thukaramaya Nyamuhanga omo Mulimu nom'okwenene.

J.C. Choate
Church of Christ
Winona, Mississippi
January 23, 1982

EMITHWE Y'EBYERYIGHA

Eky'eryigha 1: Ekyo eriramyā likaminyiisaya.....	5
Eky'eryigha 2: Abakaramaya.....	9
Eky'eryigha 3: Ekyo thukatholera eriramyā.....	12
Eky'eryigha 4: Emisindo y'eriramiryamo.....	16
Eky'eryigha 5: Eriramyā ly'abikirirya ab'erimbere.....	20
Eky'eryigha 6: Ekyiro ky'eriramiryamo.....	24
Eky'eryigha 7: Erithondekana ly'eriramyā.....	27
Eky'eryigha 8: Eryigha Biblia.....	31
Eky'eryigha 9: Emisabe.....	35
Eky'eryigha 10: Eryiimba.....	39
Eky'eryigha 11: Erirya oko meza y'omukama.....	43
Eky'eryigha 12: Eriwathikya.....	47
Eky'eryigha 13: Erithendihindana.....	51

EKY'ERYIGHA 1

EKYO ERIRAMYA LIKAMIINYISAYA

Ekyiinywa eriramywa ngoko kikakolesiibawa omo Bibilia kyikaminyisaya erihererya, erihalhamba, eriha ekyitsumbi, erisiima ok'oyiwithe obuthokyi. Neryo busana nekyo eribya ky'omughaso kikatholera ekyakolhwa n'obwenge kandi ekyasiimwa noyo thuyutheolere eripipwa. Neryo leka thwase hakuhi n'erithungerera ndeke eky'eryigha ekyi.

1. Thukaramaya habwa eriherererya.

Hano ekyiinywa erihererra kyikamiinyisaya erikolha (to minister), eryol-hobera, erikolha omubiiri, eriramywa.

Bibilia yikathuha ekyutsutsu ky'omundu oyukaramaya Nyamuhanga ng'omukoli kutse omuhererya wa Nyamuhanga kandi Nyamuhanga inyabya mukama wiwe.

Omukwenda Paulo akayikanayako ng'omukoli wa Yesu Kristo engendo nene. Akabuugha athi, "Ingye Paulo, omuhirerya wa Yesu Kristo oyo wabirikirawa eribya mukwenda, busana n'engula ya Nyamuhanga (Abaroma 1:1). Petero Na Yohana mubakolha ekyan'ekighuma ekyo Paulo akolha (2Petero 1:1) na Yohana 1:1 baminyiisaya kyi omw'ekyo?"

Baminyiisaya bathi babya bakahererya Omwami Mukulhu kutse babya bakaramya Nyamuhanga ibabirimuhererya ebyosi, nethu thukatholera erikolha ekyan'ekyighuma.

Paulo mwasiiky'akyo iniakabuugha athi, "*Niikwa lino mwabiriboholhwa oko bibi, mwabiribya bakobe ba Nyamuhanga. Mukabana enduundi y'eribya n'emighendere yibuyirire, n'enduuli ni ngebe y'erikotha*" (Baroma 6:22).

Erilhangira omubiiri owo Nyamuhanga akasonda, leka thusamalire omo masako ano: "*Nabya ngakolera omukama n'eriyikehya, omo misonia, namalighe ebyanyihikako busana n'esyombitha sya Bayuda*" (Emibiri yabakwenda 20:19). "*Neryo simuleke ekyiri kibuya okwiinywe kikatsumwa ng'ekyibi. Kusangwa obwami bwa Nyamuhanga si mwatsi w'erirya kutse eripuulya, niikwa ni buthunganene, n'obuholho, n'obutseme ob'omulimu Abuyirire akaha. Kusangwa oyukakolera Kristo athya akatsemesaya Nyamuhanga, kandi abandu bakamusiiima. Neryo thukwame emyatsi eyikaletha obuholho n'ebikathungananya*" (Abaroma 14:16-19). "*Mukole n'omuuhwa butsira buughatha. Mubye n'omuuhwa munene omo Kirimu, n'erikolera omukama*" (Baroma 12:11).

Busana n'erikolera omukama, Paulo akahandika, "*Balikyetu ngabalembalem-ba busana n'erighanyira inene lya Nyamuhanga, nyiti, muyihe uku Nyamuhanga ng, obuhere obuliho, kandi obubuyirire, obukamutsemesaya. Eri ni ramya erikutolere*" (Abaroma 12:1). "*Neryo mukolerebo nomuthima ogowene nga mukakolera Kristo, butsira bandu*"

Abanya Efeso 6:7 omukama akakania ne kanisa eye Tuatera, “*Nyinasi emibiri yawe , n’olwanzo lwawe, n’erikirirya lyawe, nerikolha lyawe, neritsingirira lyawe , kandi nyinasi ukakolha lino kwilaba erimbere*” (Eribisulirwa 2:19).

Omughulhu omunene thukakanaya oko mubiiri w’eriramya. Ekyi kyinahikire kusangwa thukabya ithukakolha omubiiri oko Nyamuhanga. Omo bundi bulengekania, engebe yethu yikanza omughulhu munene iyabya omo mubiiri wa Nyamuhanga, neryo omo mibere eyo thukaramaya Nyamuhanga omusyongebe syethu. Neryo, thwangalengekania thuti eriramya Nyamuhanga oko kyiro ky’eyenga kutse oko kyiro ky’eritsuuka eyenga kutse omo ngebe syethu, thwamathalhuka erimwowa n’erimukolera?

2. Thukaramaya Nyamuhanga erilhaba omwimupipa.

Eyo Paulo na Sila babere bane omo muliki kyikabuughawa ambu omo kathi-kathi k’ekyiro Paulo na Sila mubasaba, n’eryimba esyo nyimbo esikapipa Nyamuhanga na banyamuliki mubowabo (Emibiri y’Abakwenda 16:25). Erikania ngoko Nyamuhanga akatutsumula busana n’omubiri wiwe, Paulo akahandika athi: “*Ithwe twatsuka erihira amaha uku Kristo, tupipe olukengerwa lwa Nyamuhanga*” (Abanya Efeso 1:12).

Tukasoma kandi: “*Neryo busana na Yesu tuhe eripipa lyetu ng o’buhere uku Nyamuhanga , kandi emirenge yetu ipipe erina liwe*” (Abaebrania 13:15). Petero akabuugha; “*Neryo erirengwako eryo likaminyisaya eryikirirya lyenyu esyamaghetsi sikanehera, nasyo sikalengawako omo muliro, neryo erikirirya lyenyu eriwite enzwere nene kwilaba esyamamagetsi litolere iryalengwako, neryo mwasyabana eripipa n’oluengerwa n erisikibwa oko kiro ekyo Yesu Kristo asyabisulwa*” (1 Petero 1:7).

“*Oyukathuulagho, athuule ebiinywa bya Nyamuhanga. Oyukakola omubiiri, akolegho omo maka ago Nyamuhanga akamuha, neryo omo myatsi yosi Nyamuhanga apipawe busana na Yesu Kristo, olhukengerwa n’obuthoki ni byiwe kera na kera, Amina*” (1 Petero 4:11).

Tutholere ithwa pipa Nyamuhanga omo mibiiri yethu eyosi, omubyosi thukakolha n’eribuugha, kwilhabirirya omughulhu thukahindana oko kyiro ky’omukama busana n’eriramya, thutholere ithwakyikolha busana n’ekyilhubirirwa ky’eripipa Nyamuhanga. Thukamupipa eritsuuka eryasa lyetu oko mwanya w’eriramiryamo kandi busana n’ekyilhubirirwa kibuya eky’eriyayo kandi n’omwekyo ekyo thukakola ithuneyo.

Emithima yethu yitholere iya yibombeka erilhaba omwigha ekyiinywa, omwisaba, omwimba, omwihithya, n’omwirya oko meza y’omukama, thutholere ithwamupipa. Twangamupipa thuthi thwamaghana erikolha thuthya?

3. Thukaramaya Nyamuhanga habw’erimusiikya kutse erimuha ekyitsumbi Yesu Kristo mwabuugha athi, “*Neryo abosi batoke erisikya omughala, ngoko bakasika Tata. Oyutesikaya omughala sialisikaya Tata owamutuma*” (Yohana 5:23).

Paulo mwasakanga athi, “*Neryo erisikya n’olukengerwa bya kera na kera bibye oko mwami werikota , oyutehola ,kandi oyutelolawako, ye Nyamuhanga iyowene –wene. Amina*” (1 Timoteo 1:17).

Ni Nyamuhanga oyo kathulhamaya, niyo akathutsumulha, niyo akathuha a maha w’engebe mbuya kandi niyo atholere erithunga erisikiibwa.

4. Thukaramaya Nyamuhanga omwilhaba omwimuhalhamba.

Erimuhalhamba kyika minyiisaya erimusumbira eyighulhu kwilhaba kyindi kyindu kyosi, erisiikya, kutse eripipa. Ekyi kyikahambana n’omuthwe wethu w’eriramyā. Kandi leka thuthasyasamalira ebyasakirwe ebindi ebikathomekawa okwithumiinyiisya ndeke omwatsi w’ekyiinywa ky’eripipa; “*Neryo inywe bosi haguma n omulenge muguma, imwapipa Nyamuhanga Tata*” (Abanya Roma 15:6). “*Abaribaghulha omo buguli neryo omo mibiiri yenyu, muletere Nyamuhanga y’oluhukengerwa*” (1 Abakorinto 6:20). “*Niikwa omundu amagalwa kusangwa ni mukristo, siakwe esisoni, niikwa apipe Nyamuhanga busana neribya muKristo*” (1 Petero 4:16).

Kyitholere iribya iniisonda lyethu omo ngebe syethu erisamalira oko Nyamuhanga, erimuha oluhukengerwa, eri musumbira endatha n’erihalhamba erina liwe, butsira eri yiha erisimwa kutse eriyipipa. Eriyisosekania nayo, ithwe thuli buyira. Ekyilhubirirwa kyethu, erihindana lyethu oko kyiro ky’omukama ni hira amalengekania wethu wosi oko Nyamuhanga, eryo ly’eriramyā.

5. Thukaramaya Nyamuhanga erilhaba omwimusiikya.

Nyamuhanga niyo wathubumba na Kristo niyo mulhamya wethu. Thutholere ithwabasiikya. Thutholere ithwabowa. Thutholere ithwab’olhobera. Thutholere ithwayikehya embere syabo. Omusakangyi w’esyonyimbo mwa buugha; “*Abandu buwe mwaleterabo erilama, kandi mwalhaghabo endaghanoye erikota , naye abughirire kandi nimbangi*” (Esonyimbo 111:9). Ekyasakirwe ekyi kyi kaminyiisaya kyithi erina lya REVEREND ni rina lya Nyamuhanga. Omuhandiki wa ba Ebrania mwahandika athi; “*Neryo thubye n’ewasiingya kusangwa thukabana obwami obuthe-sukasukanibawa. Thukolere Nyamuhanga erimutsemesya, thumukenge n’erimusiiikya*” (Abaebrania 12:28). Omughulhu thukanza Nyamuhanga, n’eriyiikehya embere syiwe omwi mwolhobera, n’emithima eyitsangire thukasa okwiye neryo thukathoka omukwenene eriha emithima n’ebirimu byetu oko Nyamuhanga omwi muramyā n’erimupipa. Neryo thukaminyā ekyā Paulo aminyiisaya akabuugha athi; “*N ebyosi mukakolha, omo kyiinywa , kutse omo mubiri , mukole ebyosi omolina ly’omukama Yesu imunemuha ewasiingya uku Tata Nyamuhanga busana na Yesu*” Abanya Kolisai 3:17. Bangyi bakaghenda okw’iramyā habw’eriyilhuusya kyoko buyira kutse busana n’erikakwa n’oghundi mundu. Bangyi bakayitsungira omwiramyā, niikwa sibaliramaya.

Abo abandu sibasi ngakyikamiinyisaya kyi eriramyā, kandi kwenene sibali bathakyibana mokyī.

Omughulhu thukendiramyā, leka thuramayē n'omuuhwa kandi omo kwenene, n'omuthima owerire, n'erisiima thukasa embere w'erisiikiibwa lya Nyamuhanga n'erihalhamba, hathya kandi na kera na kera. Thwamabiryigha erimuramyā omo kwenene, ithukendyanza erimuramyā kandi kyikendithunga omubongo okwithwe n'okwiyo uyutholere eriramiibwa.

EBIBUULYO

1. Uhe omuthwe w'ekyeryigha ekyi?
2. Uthonde ekyiinywa eriramyā nga nikiyī.
3. Eriramyā eribya ly'omubongo, litholere eryabya lithi?
4. Ekyiinywa erikolha kutse erihererya kikaminyiisaya kyi ?
5. Omwana wa Nyamuhanga ni mukoli athi kwehi?
6. Iyo Paulo, Petero na Yakobo banabya bakoli?
7. Ni mubiiri wahi owo Nyamuhanga asondire?
8. Thuulha emilhondo eyihambene okw'ekyi.
9. Busana nakyi thukakanaya okwiramyā eribya mubiiri?
10. Thwanginaramyā Nyamuhanga akathuliigha esithuthamwolhobera?
11. Ghuthonde ebisakirwe ebikakangiriraya bithi thupipe Nyamuhanga.
12. Thwangamupipa Thuthi ?
13. Kyanginathokekana erisiikya Nyamuhanga thatha isithuthasiikya mu-ghalha (Yesu)?
14. Busana nakyi Nyamuhanga atholere erisikiibwa?
15. Thulhagho ekyiinywa erihalamba nga kyikaminyiisaya kyi.
16. Eriyitsutsa ly'esyingebe syethu litholere eribya lithi?
17. Uthonde ekyilhubirirwa ky'erihindana lyethu okwa oko kyiro ky'omukama (ekyiro kyasande).
18. Nindi oyuwa thubumba? Kandi nindi omulhamya wethu?
19. Thutholere itwabasiikya thuthi?
20. Erina lya Reverend ni ryandi? Kutse nindi oyutholere eribirikirwa mo REVEREND?
21. Ubuughe ekyasakirwe kya Abakolisai 3:17.
22. Abandu abanene bakaramaya bathi?
23. Ni musiindo wahi owo thutholere eriramyamo Nyamuhanga.

EKY'ERYIGHA 2: OYUKASABA

Omo bihangikwa ebyosi bya Nyamuhanga, hali kyighuma kyisa ekya ngamuramya, y'omundu. Nyamuhanga mwathahanga omundu omo mubiri musa niikwa n'omukirimu, n'obwenge. Neryo busana n'obwenge, omundu akathoka eriithwamo. Anginathwamo eriramyanya omuhangiki wiwe kutse eyihi. Omundu amathwamo eriramyanya Nyamuhanga wiwe neryo kwenene Nyamuhanga akahebawa olhukengerwa nerisikibwa.

Omundu nikihangikwa ekyitholere eriramyanya. Anganaramya ramya ekyindu kutse omundu. Athulha inianemukolha athya kandi akesyalholya embere inianemukolha omo buthuku bwiwe bweribya.

Munabwire na kera omundu athulha inyakakuukamira obuli kyindu ekyakalengekanaya; omuli ng'omukera, esyangununu, eribwe, emithi, kandi n'ebindi bindu ebyahangikawa. Niikwa omundu abiribya inyakakuukamira ebindu ebyahangikawa ng'esosano ebikolire omo mabwe, emithi n'ebiyuma niikwa omundu amanza eriramyanya omukwenene atholere erisamalira oko Nyamuhanga oyo wamuhangika n'erimulhaghira erimuramya. Nyamuhanga anzire abaramya ngabo. Yesu mwakangirirya athi: *"Niikwa omugulu akasa, kandi lino ane abaramya b ekwenene, basyaramya Tata omo kirimo n'omo kwenene, kusangwa Tata akasondaya abandu abili batya eribya baramya buwe. Nyamuhanga ni Mulimu, n'abakamuramaya litolere ibamuramya omo kirimu nomo kwenene"* (Yohane 4:23-24).

Sikirighunza omundu eriramyanya, niikwa eriramyanya lyiwe lyamabya ly'eribya n'eri liwa neryo litholere eribya lighuma kandi erikakolhawa omo Kirimu n'omukwenene. Leka thulebaye ekyi ngakyikaminyiisaya kyi kandi ngakyikayitsutsa kyi.

1. Abosi batolere ibaminyanya Nyamuhanga ow'okwenene n'oyuliho.

Ebihangikwa ebyosi bikakanganaya ngoko hali omuhangiki. Ekyi kyika-liighawa n'abandu bosu b'obwenge, bakaliigha eky'okwenene ekyi, bakakakiibawa eryasa oko ndwamo eyi. Neryo thunasi Nyamuhanga ow'okwenene kandi oyuliho yon'omuhangiki (Enzuko 1:1).

2. Nyamuhanga amabya iniyo muhangiki ow'ebindu byosi kandi ananzire omundu erimolhobera, okweryo, abiribisuulha eriyitsutsa liwe oko mundu.

Abirikola ekyi erilhaba omo Bibiliya. *"Thukabwirawa ngoko Yesu mwakolha ebindi bithiko-thiko bingyi embere sy'abigha biwe ebithasakire omo kitabu ekyi. Niikwa ebi bisakire imwatoka erikirirya Yesu kwali mugala wa Nyamuhanga, neryo imwikirirya eribana engebe omulina liwe"* (Yohane 20:30-31). Kandi thukabwirawa ngoko amasako wosi ahandikirwe omwihumulha lya Nyamuhanga kutse omwihumulha lyaNyamuhanga (2 Timoteo 3:16-17).

3. Neryo ngoko Nyamuhanga abiribuugha kandi eribuugha liwe lyabiri-

sakangwa, busana nekyo abirikanganiibwa ok'obuli mundu erilhaba omo Bibilia, neryo abirihika hakuhi. Kristo mwalhaghira abakwenda biwe erighenda omo kihugho kyosi erighira abigha (Mariko 16:15-16) isikyo kyisa, n'okwabo abakwire enyotha n'enzala busana n'obuthunganene bwa Nyamuhanga, basya suulibwa (Matayo 5:6). Kandi tukabwirawa indi aba withe omuhwa weribana Nyamuhanga akendisyabaha amaka weribya bana biwe (Yohane 1:12).

4. Omughulhu omundu akasoma n'eryigha ekyiinywa kya Nyamuhanga neryo akathunga erikirirya erikalhuua omo muthima wuwe (Abaromi 10:17). Erilhuua omo bwenge, n'erikirirya neryo akathokiibawa ery'olhobera ebihano bya Nyamuhanga ebikaletha erilhama (Emibiri y'bakwenda 2:38, 17:30; Aebrania 11:6).

5. Erilhaba omwikirirya akalhamiibawa neryo iniathomekerwa oko kanisa kandi inyabya mukristo (Emibiri yabakwenda 11:26).

6. Ngo mughuma woko kanisa ya Krsito, kandi ngo MuKristo, neryo omundu oyo akabya iniakayitekateka eriramyanya Nyamuhanga ngoko akalaghira. Akabya atyabya muKristo, Omundu akabya isyangathoka eriramyanya ngoko amasako akalaghira, tukasoma: *“Tunasi Nyamuhanga sialiowa abakola nabi, niikwa omundu amabya akakenga Nyamuhanga erikola ebyo anzire, Nyamuhanga akamowa”* (Yohane 9:31). Minya bino; hali ebindu bibiri ebikahir'aho omundu amabya w'ryowibwa na Nyamuhanga; Eky''erimbere, akatholera inyabya muramyanya wa Nyamuhanga, ekyakabiri, kandi nibya atholera inyakola ebyo Nyamuhanga anzire kutse inyakakwama erilhaghira lye kyiinywa kyomukama. Ekyi kyikamiinyisaya ngoko omundu eribya n'obuhugho na Nyamuhanga kutse obughuma haghuma n'omwana na thatha kandi eribya mukristo, omughuma w'oko kanisa ya Kristo (THE CHURCH OF CHRIST).

7. Ngo omukristo kandi ng'omughuma woko kanisa ya Kristo (THE CHURCH OF CHRIST) awithe olhukwamirwa lhw'eriramyanya Nyamuhanga omo kirimu n'omo kwenene busana na Nyamuhanga eriliigha eriramyanya eryo. Ekyo kikaminyisaya indi eriramyanya litolere erikolhwa omwa mibere eyihikire. Ekyi kyikaminyisaya ngoko litholere erikolhwa erilhuua omo muthima owo wene, omwiyibombeka nomwiyitheya , omukwenene nerisikya . Ekyi kyikayisunza omuthima owerire na malengekyian awakatumana ebyakakola. Abakaramaya sibangaramya isibasi ebyo bakakolha, ekyi ekyikendibya ekyikasekereraya kutse amasatha. Eribughirira, eriramyanya litholere iryakolhwa omo kwenene, ekyi kyikaminyisaya ngoko litholere irya ghendera omo kyiinywa kya Nyamuhanga. Neryo ekyibuulyo kyiri kyiti, nikyahi ekyo omukama abirisomesya? Thukaghenda embere neky'eryigha ekyi, thukabana bino

omo Bibilia: emisabe, eryimba, emeza y'omukama n'erishererya. Erithomeka oko, ebi bitholere erikolhwa oko kyiro ky'o mukama ini Sunday). Sikyirikolha ngabane omundu mwangabya n'omuuhwa kutse amaka w'eriramyama, eriramyama liwe lyamabya lithikolhawa omo kwenene n'omo kirimu, neryo inyakaramiraya buyisa. N'omundu mwangakolha ngoko binahandikire omo kytabu kwirabirirya ebipindi by'eriramyamo ng'eryimba, emeza y'omukama, erishererya, byamabya isibiri omo Kirimumu n'eriminyama ndeke, nabyo ni buyira. Nyamuhanga ebirishererya ekyitholere busana n'eriyisunza omundu kwangamuramyama, kyitholere ekyakolhwa ngoko asondire.

8. Oyukaramayama atholere enyabya omo mwanyama owahikire, nayo ey'ekaniyama ya Kristo (CHURCH OF CHRIST) Akayitsungirama omwabipindi byeriramyamo ebyo Nyamuhanga akalaghira na bandu abahikire busana n'eriramyama eriliwama.

Erisangasangama hano liwithe omughaso, omukristo oyohikene syangaramayama n'ebisomo muthina-muthina kutse n'ebindi bithunga byama madini. Kusangwama eriramyama lyabo niry'engabane kusangwama sirighenda-ghendanayama n'ebyo tukasoma omo masako. Omukristo kuundu kandi omughuma w'oko kanisama ya Kristo (CHURCH OF CHRIST), syangaramayama Nyamuhanga oko kyiro ky'omusangyumu (Saturday), syangaramayama nabo abakakwama ebihano by'abanduku kutse abakaghenderama omwilhaghira ly'abanduku (creeds), kandi syangaramayama n'abanduku abakimba ibanimumwathama ebyuma, abakasabirama amadini awosi, abathirya okwamezama y'omukama obuli kyiro kya Sunday nab abakahayama ebighuma bikuumi ebikongera amabehi, Paulo mwabuughama: *"simusangama omo mibiiri y'omwirimayama eyithe n'endundi, niikwama muhulhukayeyo okwakyakakalama"* (Abanyama Efeso 5:11). Yohane mwahandikama oko bakangirirya b'amabehi, *"Kusangwama oyukamukerayama inyamasangirama oko mibiiri yiwe mibi"* (2 Yohana 11).

9. Omuramyama iyowenewenema – nomokine indi omuryamayama syahikene, ekyi sikyirimuhamulama erikolama ekyanzirama indi kikamutsemesayama. Amabyama inianzirama eriramyama Nyamuhanga atholere inialekama emitse mibi ne bindu bibi. (Yakobo 5:17) inialengahama kutsibuma erihikama embere sya Nyamuhanga no omuthimama owerirama, no omubirama oweririrama ne kirimu ekyi kayolhobekama.

Ghuli muramyama eyuli athi? Ukaramayama kyiro kyahi? Ukaramayama mughulhu wahi? Habwakama ukaramayama? Ukaramayama ndi? Hali abakaramayama bangyama niikwama hali abaramayama abokwenenema bake. Abanenema bakaramayama ekyiwirama kutse omo muhanda owathere. Ghutholere iwaminayama ekyo ghukayaramayama ngama ni naky'okwenenema kandi omuhanda ngama ninagho, kandi ngaghunema mundu oyo Nyamuhanga anzirama inyama muramyama.

EBIBUULYO

1. Nikihangikwa kyahe kighuma ekyitolere eriramy Nyamuhanga?
2. Nyamuhanga mwahanga omundu athi?
3. Omundu angathwamo erikola kyahi?
4. 4 Nyamuhanga akahebawa athi ekyitsumbi?
5. Omundu nikiyi?
6. Uthonde ebindu ebyo omundu abiriramy erimbere?
7. Nyamuhanga akasunza ndi oyutholere erimuramy?
8. Soma Yohane 4:23-24) kandi uthulegho kangaminyiisayaki.
9. Nindi oyowalhwa okwa Nyamuhanga?
10. Thonda enzuko 1:1.
11. Nyamuhanga anabiribisulha erisonda liwe oko mundu?
12. Ekyi akyikolha athi?
13. Ghusome Yohane 20 :30-31 na Timoteo 3:16-17
14. Habwaki Nyamuhanga akanza omundu iniaminya eriyisunza liwe ?
15. Omundu anginaminya eriyisunza liwe?
16. Nibahe abo Nyamuhanga abiriyisunza eribirikirwamo bana biwe?
17. Erikirirya likabuthuka lithi omu muthima womundu?
18. Omundu akalama erilhaba omundi?
19. Nindi oyuyithekathekyire eriramy omwami mukulhu ?
20. Nyamuhanga akanowa ababihya ? kandi habwaki?
21. Ni mibere yahi eyikatholera erithunga obuhugho na Nyamuhanga?
22. Kikaminyiisaya ki eriramy Nyamuhanga omwakirimu no'mukwenene?
23. Omundu atholere iniabyahe busana neriramy Nyamuhanga?
24. Busana nakyi erihindana liwithe omughaso?
25. Ghuthule ebindu ebyo omuKristo owa hikira syatholere erikola?
26. Abaramya abatholere erihika bathi oku Nyamuhanga
27. Hane abaramya banene ab'okwenene?

EKY'ERYIGHA 3: OMWATSI W'ERIRAMYA

Omwitsuka okwihangika, omundu abiriramy obulikindu ekyiri ahisi heryuba n'eriryubya nibya. Hali esimilioni sinene sy'esyo nyamuhanga n'esonyamuhanga sy'obukali omo kyihugho, n'amahekalo manene wabo abakasiramaya nikwa kandi ihane bandu banene abathitsemera obwikirirya, busana nakyi? Ekyiritho ni kyahi? Omulyambo ni wahi?

Ekyindu ekyithahikire kyiri kyithi abandu bangyi sibali biikiiriirya Nyamuhanga mughuma oyuliho kandi ow'ekwenene. Kristo akamukanganaya aka-

buugha ati, “Nyamuhanga ni Mulimu n’abakamuramaya batholere ibamuramya omukirimu n’omo kwenene” (Yohane 4:24). Neryo Nyamuhanga yutholere eriramiibwa n’omundu. Neryo amigha kyino akaha eriramya liwe oko Nyamuanga neryo inyakendibana obuholho obu abirisonda omo mu-ghulu muli.

Omuky’eryigha kikuuhi ekyi, thwanzire itwaminya Nyamuhanga ng anindi kandi nga nibusana nakyi thutholere erimuramya.

1. Nyamuhanga niyo muhangiki w’obuli kyindu.

“Okwitsuka, Nyamuhanga mwahangika olhubulha nekyihugho” (Enzuku 1:1). Kyanginaghaniibwa ambu busana nakyi Biblia yikabuugha ekyi, niki ek-yikakanganaya obwimiri okw’ekyi? Neryo samalira ebyosi ebiri hakuuhi nawe ebyo Nyamuhanga abirihangika. Ekyihugho n’ebirimo bikakanganaya ngoko Nyamuhanga aneho, Ekyindu sikyakyangalhuua omo mwanya buyira, neryo ekyo kyikaminyiisaya ngoko hane omuhangiki wakyo. Daudi mwabuugha athi, “Olubula lukakanaya olukengerwa lwa Nyamuhanga , n ekyanya kikabisula ndeke ebyo abirikola.” Oyo wangaghania ekyi nindi kwehi? Nindi asyakighania kwehi?

Nyamuhanga mwahangika omulhume n’omukali omo kisoekanio kyiwe. Mwabuugha ati: “*Thuhangike omundu omu kisoekanio kyetu atabale oko mahere owo-monetse, oko syo nyama noko buli kindu ekyikakulululuka oko kitaka. Neryo Nyamuhanga mwahangika omundu omwa kisusekyio kiwe mwahangika erisosa Nyamuhanga, mwahangikabo omulume no omukali*” (Enzoko 1:26-27). “*Neryo omwami mukulu Nyamuhanga mwabumba omundo omulututu lwa ekyitaka , neryo mwabuhira omunindo yiwe m omumoka w engebe , nomundu oyo mwabya omundu oyuliho*” (Enzoko 2:7).

2. Nyamuhanga mwathuma omwana wiwe Yesu Kristo erilhamya omundu oko bibi.

Erikwamana n’ekyilhubirirwa ky’eryasa lya Yesu Kristo, Thukasoma: “*Kusangwa Nyamuhanga mwanza ekyihughu ky atya, kyaleka iniahayo nugala wuwe ekyusa kiwe ,neryo oyukamwikiriraya siahere, niikwa abye n’engebe ye’rikotha. Kusangwa Nyamuhanga mwatatumu mugala wuwe omo kyihugho eribya mutsweri wakyo, niikwa omulama wakyo*” (Yohane 3:16-17). Paulo akahandika; “*Niikwa Nyamuhanga akakangaya olwanzo luwe busana netu, kusangwa omugulu twabya tukine bakola nabi, Kristo mwatuholera*” (Abanya Roma 5:8). Kandi akabuugha ati: “*Ekyi nikibuya, kandi kikatsemesaya omulama wetu oyo wanzire abandu bosu balamibawe n eriminya ndeke omwatsi we’kwenene*” (1 Timoteo 2:3-4). Busana n’erilhama lyethu, akasakanga athya: “*Kusangwa mwabirilamibwa omulukogu lwa Nyamuhanga omo nzira y’erikirirya n’erilama eryo si kola lyenyu ni luusuunzo lwa Nyamuhanga. Omundu siayipipe, kusangwa si mubiri w’omundo*” (Abanya Efeso 2:8,9).

3. Nyamuhanga abirithutsumulha n'emighisa y'ekinyamulimu haghuma na kinyamubiri.

Yakobo akahandika, “*Obuli lusunzo lubuya no obuli lusunzo luwene , bikalua endata , kandi bikasira uku Tata w ekyakakala kyosi, oyutibinduka kutse eriyihindula*” (Yakobo 1:17). “*Tupipe Nyamuhanga Tata w'omukama wetu Yesu Kristo! Busana n erimatikana na Kristo Nyamuhanga abirituha omughisa munene. Abirituha obuli muyisa w'ekyirimu owakaluua omo myanya y'e lubula*” (Abany Efeso 1:3).

3. Hali Nyamuhanga mughuma ow'okwenene kandi oyuliho.

Akabya akakania oko bughuma bwa Nyamuhanga, Paulo akakangiriraya athi; “*Hali Nyamuhanga mughuma ise w'abandu bosi, oyuli endata oko bosi, kandi akakolera omo bosi, kandi ali omo byosi*” (Abanya Efeso 4:6). Akathasya buugha athi, “*Hali Nyamuhanga mughuma kandi hali omusangania mughuma wa Nyamuhanga na bandu nayo ni Yesu Kristo.*” (1 Timoteo 2:5).

4. Nyamuhanga ni Mulimu.

Thwabirisoma omo Yohane 4:24, aho kyikabuugha ndeke ngoko Nyamuhanga ni Mulimu. Ekyi kikaminyiisaya Nyamuhanga kyithi syali omo mubiri haghuma n'omusasi, syali kyi nyamubiri, si kindu, neryo thwamabiriminya thuthi Nyamuhanga ni Mulimu neryo ithukendiminya ndeke, kandi n'erirengekania Nyamuhanga kwali ahighulhu oko mundu kandi kwali oko lhu-lengo olhundi.

6. Nyamuhanga ni lhwanzo.

Yohane akabuugha: “*Oyutianza sialitaminya Nyamuhanga, kusangwa Nyamuhanga ni lwanzo. Olwanzo lwa Nyamuhanga lwabiriminyikala ukw'itwe omo mwatsi ono ati, Nyamuhanga mwatuma omugala wuwe eribya mbanulo busan n ebibi byetu. Abanze betu, Nyamuhanga amatwanza atya, netu litolere itwanzana*” (1 Yohane 4:8-11).

7. Nyamuhanga aneho namunabwire.

Petero mwabuugha nobuno bwiwe akwa Yesu ati, “*Uli Kristo, mugala wa Nyamuhanga oyuliho.*” (Matayo 16:16). Paulo a kakanaya oko kanisa ya Nyamuhanga oyuliho (1 Timoteo 3:15), kandi abuugha, “*Kusangwa abandu bosi batulagho ngoko mwatukokay, kandi ngoko mwaleka esyosanamo ne'ribindikira Nyamuhanga, imwatoka erikolera Nyamuhanga w'okwenene oyuliho*” (1 Abanya Tesalonika 1:9). Abandi bakabuugha ambu Nyamuhanga aholire niikwa nibo baholire kinyamulimu. Nyamuhanga aneho, Yesu Kristo mwabuugha; “*Nyamuhanga si Nyamuhanga wabaholi niikwa ni Nyamuhanga wabalihho*” (Matayo 22:32).

8. Busana na Nyamuhanga ebwosi bikathokekana.

Yesu abere akakania n'abandu oko mundu oyutholere erilamiibwa, mwabuugha ati, “*oku bandu ekyi sikyangathokekana, niikwa oku Nyamuhanga emyatsi yosi ikatokekana*” (Matayo 19:26).

9. Sihali oyuhikerere liriryo nina Nyamuhanga.

“*Yesu mwamubuulya ati, busana naki ukanyahula mo mubuya kwehi? Sihali mubuya nina Nyamuhanga iyowene*” (Marako 10:18).

10. Sihali mundu oyowabirihangira Nyamuhanga.

Yohane akahandika ati: “*Sihali mundu wabirihangira Nyamuhanga na kera, nina Nyamuhanga ekyusa oyuli oko kikuba kya Tata, yo wabirimuminyisya.*” (Yohane 1:18).

Twangina ghenda embere n’eriminya thuthi, Nyamuhanga syalyubaha mundu (Emibiri ya Abakwenda 10:34,35), kandi anasi obuli mubiiri eritsuu-ka okwihangikwa ly’ekyihugho. (Emibiri y’abakwenda 15:18). Kandi athi akendisyatwera obuli mubiiri wakolawa omo bubiso-biso, erilhaba omo Yesu Kristo (Abaromi 2:16). Kandi akaha engebe y’erikotha (1 Yohane 5:11).

Nyamuhanga oyo thukakanayako anasi obuli mwatsi wosi, akowa ebyosi, akalangira emyatsi yosi, ali ehosi oko butuko bughuma, awite amakaa manene, sawite nzuuko kandi syawithe muhiindo. Sihali kyindu wangamulingirania nakyo, ni muhangiki w’obuli kyindu, niyo musa atholere eriramiibwa, eripipwa, erisiikiibwa, kandi n’erihabwa ekyitsumbi, omughulhu ono na kera.

Nyamuhanga akasonda ithwamuramya niikwa kandi syalithukaka athi tumuramaye. Niikwa kandi abakakyikolha akatsumulh’abo.

Niikwa kandi syaliriigha obuli muthina w’eriramya. Thwamabya ithuken-dimuramya litholere ithwaghendera okw’ilhaghira lyiwe butsira eryethu, Abiribisulha omuthina wiwe mughuma w’erimuramiry’amo erilhaba omo kyiinywa kyiwe kandi thukayalhangira omuhanda oyo omo by’eryigha ebyo thukayamo ahambere.

EBIBUULYO

1. Omundu asibwe busana n’eriramya bihi?
2. Thanda ekyisobire busana n’ebisomobinene by’abandu?
3. Uhandike Yohane 4:24.
4. Omundo atholere inyaramya kyi?
5. Ubuughe Enzuko 1:1.
6. Uhereraye obwiimiiri busana n’eribyaho lya Nyamuhanga?
7. Niki ekyikakanganaya olhukengerwa lhwa Nyamuhanga?
8. Nyamuhanga mwahanga omulhume n’omukali athi?
9. Buasana naki Nyamuhanga mwathuma omwana wiwe Yesu Kristo eryasa oko kyihugho?
10. Handika Yohane 3:16-17.
11. Nindi oyuwathuholera?
12. Thukalamiibawa thuthi?
13. Emighisa yosi yikalhwa hayi?

14. Ghusome Abanya Efeso 1:3.
15. Paulo akabuugha athikiyo oko mwatsi w'obughuma bobwa Nyamuhanga?
16. Wangana kania oko Nyamuhanga ghuthi?
17. Thonda, eribuugha ghuthi "Nyamuhanga ni lhwanzo".
18. Nyamuhanga aneho munabwire? Omo muthina wahi?
19. Ebindu byosi byanganathokekana busana na Nyamuhanga? 20. Nindi oyuthunganene?
21. Hine omundu oyowalholire oko Nyamuhanga?
22. Nyamuhanga akanuubaha mundu?
23. Nindi eyo wasyatswera ekyihugho?
24. Uthule ebihambene oku Nyamuhanga.
25. Ni ramya lya mulingokyi eryo Nyamuhanga asondire?

EKY'ERYIGHA 4: EMIRINGO E YIRIRAMIRYAMO

Thwamasoma ebitabu by'endaghano enyihya-nyihya, thukeghaya emithina isathu eyikakaniibawako okwiramya, omuky'eryigha kyino, thukendilebya obuli musindo. Thukendiminya ngoko Biblia yikakanganaya oko musindo mughuma musa ow'eriramiryamo owokwenene. Kandi thukendilebya n'eyindi mibere ey'eriramiryamo imuthwathoka eriminya omusindo mughuma musa ow'eriramiryamo owo Nyamuhanga akathusond'ako. Neryo ekyo kikkendithuwathikya eriminya ngoko emiramirye ey'abandu siyirisiimawa na Nyamuhanga nomo kyine ambu banemuramya.

1. Amasako akakanaya okwiramya ery'obuthaminyanya.

Neryo omugulhu Paulo abya akalinda Sila na Timoteo, omuthima wiwe mwabya n'obulighe, kusangwa alhangira omuyi we Atene inioswire mw'ebisosano ebikaramibawa. Neryo mwabya akakanirya omo nyuumba y'erihindanamo haguma n'abayuda n'abandu b'ebihanda ababya bakubaha Nyamuhanga, kandi mwaya omo kathale obuli kiro akakanirania n'abandu ababyaho. Kandi abandi b'amenge ba Epikurio na Bastoiko mubakania na Paul. Abandi ba kubo bathi omubuyi w'ebingyi oyu, akasonda eribuughaki kwahi? Abandi bathi Ni mundu w'erithula emyatsi yesyo nyamuhanga sy'ehandi, kusangwa Paul abya akathula omwatsi wa Yesu n'erilhubuka oko baholi. Neryo mubathwala Paulo oko Arepago bathi; thwanzire eriminya erikangiririrya lihya-lihya eryo ukakangiririraya nga ni ryahi. Emyatsi eyo thukowa ukabuugha ni y'ehandi eyo thutasi, neryo thwanzire eriminya omusindo wayo, kusangwa Abanya Aetene n'abehandi ababya bakabalhamir'aho, mobasiba omugulhu gosi bakabuuga kutse bakowa emyatsi mihya-mihya misa-misa.

Neryo Paulo mwahangana omo kathi-kathi ka Areopago, mwabuugha athi, inywe balume be Atene ! Ngalebaya ko muli bandu b'ekyisomo kutsibu omo myatsi yosi. Kusangwa nabere ngalhaba omo muuyi wenyu, inyinemuleb-ya ebindu ebyo mukaramaya, moneya ekyiherero ekyisakirw'eko kiti "Oko Nyamuhanga oyuthasiibwe". Neryo oyo mukaramaya isimumwasi, yanoyo ngabathuulirako. Nyamuhanga oyo wahangika ekyihugo n'ebindu byosi birimo iye ni mukama w'olubula n ekyihugo, syalikala omo syohekalu esika-himbawa omo byala by abandu. Kandi syalikolerawa n'ebyala by'abandu, nga ali n'obwagha bw ekyindu, kusangwa akaha engebe n'omuka n ebindu byosi oko bandu bosu. Kandi omo mundu mughuma mwahangika ebihan-da byosi by'abandu eryikalha omo kyihugho ehosi kandi mwasoha emigu-lu yabo, n emitima y'obwikalo bwabo. Akolha athya athi, kumbe bangas-onda-sonda Nyamuhanga athi mbino bangamumatha-matha n erimubana, niikwa Nyamuhanga syali hali ukw itwe oko buli mundu. Kusangwa bakabu-ga bathi: Erimathana naye thuliho, kandi thukalendera ithuneho. Ng'abandi basaki benyu b'esyonyimbo bakabuugha bathi: "*Nethu thuli bana buwe nibya ! Neryo twamabya tuli bana ba Nyamuhanga siritolere tukaganirya tuti Nyamuhanga ali ngesyosanamu sy esyamagetsi kutse sye kitsipa, kutse sy eribwe esikabumbawa omo minge n obulengekania bw abandu. Nyamuhanga abirikirukya ameso oko migulu eyo bandu bat-aminya niikwa lino akahana bandu bosu ehosi bangabindula emitima yabo erireka ebibi. Kusangwa Nyamuhanga abirihira ekyiro ekyo asyatwera ekyihugo omo litunganene omo mundo oyo abiriyisoga, iniakaminyiisayakyo oko bandu bosu iniakalubukaya omundu oyo y'oko baholi!*" (Emibiri Y'Abakwenda 17:16-31).

Neryo hano ghukalhangira Paulo akalhwa n'eriramyanya ly'ebisosano eAt-ene, akaghana eriramyanya eryo inyakabuugha athi likakolhawa omo buthamin-ya neryo akaghenda embere eribakangirirya eriramyanya ery'okwenene erya Nyamuhanga mughuma oyuliho. Busana nakyi bakaramyanya ebisosano?

Busana nakyi omundu akathwamo eriramyanya ebisosano? Ekyisosano ky'eky-indo ekyibumbire omo mabwe, omuthi, ekyuma kandi isikiyiwithe engebe ku-tse ekyinya mulimu. Sikyangalhangira, sikyangowa, sikyangabehererya, sikya ngabuuga, sikyangagenda, sikyangalengekania, kutse eritsumulha. Nomoky-ine ambu ekyisosano ekyo kyikimanira ekyindi kyindu, niikwa ekyisosano ekyo nikyo kyikaramibawa nga nyamuhanga.

Niikwa abo basa abatasi Nyamuhanga w'elhubula nibo bangaramyanya ekyiso-sano kutse erikyikuukamira ekyo ekyiri omo buhangwa kutse eky'erikokothya n'omundu kutse ekyiholire.

Munabwire, kutse esah'eno abandu banngyi bakaghenda embere ebani-muramyanya ebisosano omo kyihugho. Niikwa busana nakyi? Omulyambo aka-

sighalha ini butamina ikyinayikangenie kandi ikyinalhobire. Sihali mundu w'obwenge kutse oyo wabirikangiriribwa oyo wangaramya ekyisosano kutse ekyindu ekyibumbire n'omukyanga bya omo bukristo kutse abakabuugha bathi niba Kristo omo liina lisa.

2. Amasako akakanaya okw'iramirya buyira kutse erithe moky.

Kristo mwabuuga: *“Niikwa bakanyiramiraya buyira kusangwa bakakangiriraya amahano w'abundo nga ni mahamulo wa Nyamuhanga”* (Matayo 15:9). Kandi akabuuga: *“Siy'omundu oyukanyahulha athi mukama, mukama yo wasyingira omo bwami bw'elubula niikwa yan'oyukakolha erisona lya Tata wage oyuli Elubula Omughulhu ekyiro ekyo asyasa, abandu bangyi basyabuuga nage bathi, mukama! Omo liina lyawe mothuthakolha ebithiko-thiko bingyi kwehi? N'omo liina lyawe mothuthahiga esyombinga kwehi? Neryo na syabwirabo nyiti mondabamina na kera mulue aho nyiri, inywe bakola nabi”* (Matayo 7:21-23).

Kyi-kyina kangiriribawa omo myanya minene ambu abandu ba Nyamuhanga banginaramya omo mibere minene, ghulhusiryeho bamabya ibanemumiinyiisya ekyo bakakola, ambu Nyamuhanga iniakendiliigha eriramy lyabo. Ekyo sikwenene. Eriramy ly'omundu likabya lyabuyira lyamakolhwa ngoko engangirirya n'ebihano bya abandu bikabuugha. Eriramy buyira kyikaminyiisaya eriramy erithemokyi kutse erithawithe mughasu. Ekyo thukabuugha kiri kithi eriramy ngeryo siririliigawa na Nyamuhanga.

Abandu eribuugha ambu bakahiindana omwa lina lya Yesu sikyiriminyiisaya ambu Nyamuhanga akaliga eriramy lyabo. Ekyerimbere bamabya ibakahindan nge Dini neryo bakabya isibalihindana omwa lina lya Kristo kulhusyaho ibakahindana omwa lina lye dini. Kandi abandu abo bakabya ibakaramayi nge emibere eye kyithongole kyabo ekyo. Eryongera kwekyo, eriramy lyabo likakolhawa ngoko edini yabo ikakalhaghira. Nyamuhanga akabuugha athi abandu banene bakendisimana oko kyiroyerithwerwa kandi obuli mundu akesyathulhagho oko byakola. Niikwa kusangwa sibathakolha ngerisona liwe kandi sibaghuma boko kanisa yiwe, akendisiyaghanabo .

Eriramy lyaghu lyamabya irikakolhawa ng'erikangirirya ly' abandu kutse ighukakolha ebithe omo masako, ghuminye ko niryabuyira kandi Nyamuhanga syangaliigha eriramy eryo. Eno y'endambi utholere ewalebya ndeke emibere y'eriramy lyaghu.

3. Amasako akakanaya okwiramy ly'okwenene.

Kristo mwabuugha atya okwiramy: *“Nyamuhanga ni mulimu n abakamuramaya litorere ibamuramy omo kirimu n omo kwenene.”* (Yohane 4:24).

Leka tusamalire ebindu bike hano. Ekyerimbere, Nyamuhanga atholere eribya ky'eriramy kyethu ngoko thwabirisoma omo kyeryigha kyethu

eky'enyuma. Eky'akabiri, abakaramaya batholere ibaramya ngoko erilhagira lya Nyamuhanga likabuugha. Sihali erikaka omundu oyukasonda eriramy Nyamuhanga. Neryo abakayisoha eriramy Nyamuhanga batholere erighendera omwilhaghira liwe butsira eryabo. Ekyakasathu, eriramy litore eribya omwakirimu no'mokwenene , neryo ekyo kyikamanyisa yakyi? Kyikamanyisa kithi eriramy omukirimu niramy omukwenene, nomo bulengekania obo kwenene n'eriminy ndeke. Eriryamy omukwenene kyikaminyiisaya indi ebyo thukakolha omwiramy bitholere ibyakolhwa ngoko amasako aka-buugha. Neryo ekyo sikyolhobire kwehi? Oko bandi kyikabya isikiwithe mani. Abangyi bakanza bakaramya ibakolha emyatsi minene, emirwa (rituals), emibalha (ceremonies). N'abandi bakanza ibakolha bathi banga berererya mukonga buyira, ne yindi myatsi minene. Niikwa ekyo sikyo Nyamuhanga anzire. Anzire abandu biwe ibamuramy erilhwa oku mitima yabo ngoko akalaghira, siliyisunza bike okwaho kutse binene okwaho.

Eri ly'eriramy eryo Nyamuhanga akasomesaya omo ndaghano enyihyanihya, kandi thukaghenda embere n'ekyeryigha kyethu ekyi, thukendilhangira ngoko ekanisa ey'erimbere muyaramya yithya; nethu kothutholere ithwaramya thuthya. Thwamakolha thutya ithwamaramya ngibo kandi Nyamuhanga iniakendiliigha eriryamy lyethu.

EBIBUULYO

1. Ni mihanda mingahe ye riramy eya thukeghaya omwa ndaghano nyihya -nyihya?
2. Uhe ekyilhubirirwa ekya ky'eryigha kyino?
3. Ni muuyi wamuthina kyi, owo Paulo asanganamo Atene?
4. Ghubuughe omuhanda ow'abandu be Atene babya bakaramyamo?
5. Paulo mwabuugha athikiy okwiramy lyabo eryo?
6. Ghubuughe esyanzumwa esyabya omwikangirirya lya Paulo oko bandu be Atene?
7. Mwababwira eriramy ndi?
8. Busana nakiy babya kakaramya ebisosano?
9. Ekyisosano kyikolire omu kyi?
10. Ghuthule ebindu ebyo ekyisosano kyithe kyangakolha?
11. Omundu anginaramya ekyisosano kandi inyabiriminy Nyamuhanga ow'okwenene kandi oyu liho?
12. Hane abakaramaya ebisosanao munabwire ?
13. Ghuhandike Matayo 15:9.
14. Ghusome Matayo 7:21-23.

15. Eriramya buyira kyikaminyiisaya kyi?
16. Eriramya ly'omundu lyanganaliwa na Nyamuhanga habwa erikwami-buga ambu liri omo liina lya Yesu?
17. Ni ramya lya muhanda wahi eryo Nyamuhanga asondire?
18. Nindi oyo thutholere eribya ky'eriramya kyethu?
19. Nyamuhanga angana kaka omundu erimuramya?
20. Okwilhagira lya ndi, eriramya ritholere erya kolhwamo?
21. Thonda nga kyikamiinyiisaya kyi eriramya Nyamuhanga omo Kirimu n'omukwenene?

EKY'ERYIGHA 5: ERIRAMYA ERY'ABAKRISTO EB'ERIMBERE

Ni kindu kyowene eriminyanya abandu nga bakaramaya bathi eyo abakaramiraya, ngabakaramaya ndi, ebyo ba kakola bakaramya n'ebindi n'ebindi. Ni kwenene thunasi ngoko hali ebisomo thethethe kandi ngoko bakaramaya omo mibere eyithe mighuma. Habwaki esyambagane? Hanatholere ihababya esyambagane? Thwangaminyi thuthi nga thukana ramaya ngoko Nyamuhanga asondire? Emibere emibuya yeriminyanya ekyo, lye righenda omo masako kutse omo Bibilia neryo ithwalebya abakristo ab'erimbere ngamubaramya bathi.

Linyuuma w'ekanisa eritsuuka oko kyiro ekye Pentakoti, ebisakire bika-buugha bithi: *“Neryo mubasiba bakiga erikangirirya ly abakwenda n eribya buguma nabo kandi babya bakahika okwa mesa y omukama n okwisaba”* (Emibiri Ya bakwenda 2:42). Abikirirya kutse abakristo aba mubikalha omwikangirirya lya bakwenda kutse omwisomwesya lya bakwenda , mubakolha kyi? Nomukyine ambu ebipindi ebyosi sibiri omo sura ya 2:42, niikwa ebipindi bisathu bineho, omuli eryiga ky'abakwenda erikenyuulha omugati kutse erihika oko meza n'emisabe.

Linyuuma, Paulo akaghenda oko lhughendo lhwawe lhwerrithuulira, *“Neryo oko kyiro eky'eyenga motwahinda oko mesa y omukama, neryo Paulo mwakangirirya bandu, neryo mwabuga bingi erihika omo kati kanene kusangwa abya anzire eriluaho engyakya”* (Emibiri Yabakwenda 20:7). Thukendisamalira hano ngoko ekyiro ky'eriramiramo kyabya ky'eyenga kutse eky'eritsuuka eyanga (kyiro kya Sunday). Ekyi kyikamiinyiisaya kyithi Paulo mwahiika ekyiro kyababalazi neryo mwalinda eyenga eyosi n'erilhaba oko kyiro ky'ebirinda kutse ekye Sabato busana n'eriramya nabo oko kyiro ky'eritsuka eyenga, ekyiro eky'omukama wethu ahiraho. Erithomeka oko, kyikabuughibawa ambu oko kyiro ekyo mubahika oko mesa ey'omukama wethu. Neryo oko kyiro ikyanekyo

Paulo mwakolesya omughisa oyo erithuulha engulhu, linyuuma mwayighendera omo nzira syiwe.

Omo I Korinto 10 na 11 thukasangana Paulo akasakangira banyikiyiwe oko mubongo w'erirya oko meza y'omukama: *"Kusangwa eby'omukama anyikangiriraya bya nebyo nabirikangirirya nyiti, Omukama Yesu ekyiro ahotharawa mwimya obundu, Neryo abere abiriha ewasiingya oko Nyamuhanga, mwathwabo mwabuuga athi obu ni mubiri waghe busana n'erinyibuka. N'enyuma w'erirya, mwimya olhuthehi; 'Athi, olhuthehi olhu ni ndagane nyihya-nyihya omo musasi waghe, mukole muthya emighulu yosi mukapuulya kulho busana n'erinyibuka. Kusangwa emigulu yosi mukalya obundu obu neripulya oko lutehi, mukakanganaya oluholo lwo omukama, erihika aho asyasire. Erihika oko mesa eritatolere. Neryo omundu oyo kalya oko bundu obo bw'Omukama kutse eripuulya oko lutehi luwe omo musindo owatatolere, eniabirihalya oko mubiri n'Omusasi w'Omukama. Niikwa omundu ayitswere, neryo alye oko bundu amatindaminyi ndeke omwatsi w'omubiri w'Omukama omugulu akalya n'eripuulya oko mesa eyo, akayilethera olubanza omughulhu akalya n'eripuulya oko mesa eyo. Ekyi kyalekire abangyi omo kathikathi kenyu ibalhwala n'eribya bolho-bolho, n'abandi babiriholha"* (1Abanya Korinto 11:23-30). Leka thuhareraye eby'eryigha bikulhu omo kyasakirwe kino:

1. Paulo mwathunga eky'erikangirira ekyi erilhwa oko Nyamuhanga.
2. Akakania ok'obundu kutse omugati owa akimanira omubiri wa Kristo n'olhuthehi olukimanira omusasi wuwe.
3. Bitholere eriribwa busana n'eryibuka omubiri n'omusasi wa Kristo.
4. Neryo omwikolha ekyo abakristo bakakanganaya oluholho lhw Yesu erihika aho asyasira.
5. Neryo abakalya oko mugati oyo n'omusasi wiwe omwa nzira eyithatholere bakayilethera olubanza.
6. Bathe bayalya, ibatsuuka eriyitswera n'eriyirebya omundu ngimene athi na Nyamuhanga wiwe. Hano enzumwa yiri yithi omundu a mabya isyimene ndeke na Nyamuhanga atsuuke eriyisubamo imwanalya oko meza. Kyan-ganasond'ibuuwa kyithi omundu amabya isy'imine ndeke na Nyamuhanga wiwe isyalya neryo niikwa amayisubamo atholere inialya kutse amabya inyanimene ndeke kandi inianginalya okoa meza. Neryo ekyosi ekyiri omo muthina w'omundu isikyitholere eribyamo atholere inyakyilhusy'amo neryo omundu oyo inyathoka erirya oko meza ngo Mukristo oyutholere.
7. Abandu ba Nyamuhanga sibatholere eriyikumira oko meza eyi ngoko Paulo akabuugha, athi obuli mundu ayilebaye isyalyayitsungira omo mukonga w'erirya oko meza. Nyamuhanga akasamalira omo muthima, niikwa ithwe ng'abikirirya b'ekanisa sithuli thuthya. Nokweryo, sithuwithe bwiranda obw'eritswera mundu, niikwa nilhukwamirwa lhw'omundu iyuwene-wene

eriyirebya erikwamana n'ebye Biblia yikakangiriraya.

Kandi n'omo kitabu kya Banyakorinto y'erimbere, Paulo akatsweba abandu be Korinto busana n'erikolha emeza y'omwami Mukulhu nga ni kyihulho eky'obulikyiro kandi ibakakyikolha ng'ekyindu kyithawithe mubongo. Akabiibuukaya ngoko banawithe amanyuumba wabo aw'eririramo n'erinywiramo athi neryo omugulhu bakahiindana okwiramya si kyibye nzumwa ngulhu yabo busana n'erirya n'eriinywa bakughuthya amabunda wabo. Kandi ekyi kyekyikakolhawa na munabwire. Abaristo batholere ibahiindana busana n'omuuhwa w'eririrama kutse busana n'enzumwa ngulhu ey'eririrama. Abakristo bathorere ibasangasangana busana n'erithwa omugati n'eripuulya oko lhuthehi ibakibuka omubiri n'omusasi wa Kristo, sihali kyinene okwaho. Neryo thwamasoma omo 1 Korinto 16:1-2, thuwite omusakangyi iyan'omughuma akakania oko bihembo kutse oko omwatsi w'erihithya. Akahandika athya: "Neryo busana n'omwatsi w'eriwatikya balikyethu abandu ba Nyamuhanga, mukole ngoko nategeka esyokanisa sye Galatia. Oko buli kiro ky'eyenga obuli mundu abike ekyihandi ky'endundi akabana butsira erilabya ekyibo ekyiro nasyahika" Kandi akabuugha kutse a kahandika: "*Uminye ekyi oyukabiba bike asyagesa bike n oyukabibiba bingi asyagesa bingi. Obuli mundo ahire omo kibo ngoko abiriyisoga omo muthima wewe siahe n'obuhemu kutse erikuunwa kusangwa Nyamuhanga anzire omundu oyukaha n'eriyisyandira*" (2 Korinto 9:6-7). Neryo busana n'ekyasakirwe ekyi, ni kwenene abandu ba Nyamuhanga batholere ibahererya, neryo kandi thukasoma omo kyisakirwe ekyi mo bino:

1. Babya bakahererya oko kyiroyo ky'erimbere kutse Sunday.
2. Abakristo abosi ibakahereraya.
3. Ibakahereraya ngoko babiriyithoka erishererya.
4. Erihererya lyabo erikabya ngoko babiriyithoka. Sihali oho endaghano enyihya-nyihya yikakangiriraya erishererya ekyiguma ky'omwikuumi, kandi siyiwithe aho yikabuugha yithi omundu ahereraye omukenzo w'esyambulho.
5. Ibakahereraya ngoko omundu abiriyisoha omo muthima wuwe.
6. Isibalihereraya n'erikuunwa kutse ngabakakakawa.
7. Niikwa ibakaha n'ewasingya kusangwa Nyamuhanga akasiima omundu oyukaha newasingya n'eriyisyandira.

Hali eby'erilhangirako busana n'eryimba omo ndaghano nyihya-nyihya. Kandi hane aho Paulo na Sila bimbira Nyamuhanga n'erimupipa ibane omo muliky (Emibiiri Yabakwenda 16:25).

Neryo ebyasakirwe n'erihumulha lya Nyamuhanga bikalghira abakristo eryimba (Abanya Efeso 5:19; Abakolisia 3:16). Neryo ekyo nikighuma oko bipindi ebye'riramiramo ly'abaKristo. Neryo ebyosi ebi eribihira haghuma

thukeghaya indi abandu ba Nyamuhanga ibakasangasangana haghuma obuli kyiro kye' rimbere omwawiki kutse obuli kyiro kyasande ibakasaba, bakiga ekyiinywa, ibakimba, ibaka hika okwa meza kandi ibakahereraya.

Thwamaminya ebya abakristo ab'erimbere babya bakolire oko mughulhu oyo bakaramya Nyamuhanga. Nethu sithwangakolha ikyaneyighuma ekyo kwehi?

EBIBUULYO

1. Amaramiryo amanene akanaramaya omo mibere eyisosene?
2. Thwangaminya thuthi ngathunemuramy Nyamuhanga ngoko asondire?
3. Muhabya kyi linyuuma w'ekanisa eritsuuka oko kyiro kye Pentekoti?
4. Emibiri y'abakwenda 2:42.
5. Abikirirya mubaghenda embere n'erikolha bihi?
6. Ebipindi ebyosi eby'eriramyamu banathuherebyo, hanu?
7. Habwaki Paulo mwimana eTroa habwa ebiro bike?
8. Emibiri y'abakwenda 20:7 yikabuugha yithi kyi?
9. Ni kyiro ky'eyenga kyahi eky'akristo bahindaniramo?
10. Buugha ebighuma byoko bindu ebyo bakolha?
11. Abakristo babya ini bahayi?
12. Ni byahi ebyo Paulo athunga erilhuua oko Mukama?
13. Busana nakyi babyabatholere erirya obundu n'eripuulya oko lhuthehi?
14. Ekyi kyaminyiisaya kyi?
15. Ni muhanda wahi ogh'omundu angalyamu ow'athahiikiire?
16. Ghaniraya oko biinywa ebi, "Neryo omundu atsuke eriyitswera imwalya."
17. Omundu anginanywa n'eriyirira olubanza kwehi?
18. Kyanginathokekana omundu eribya mukristo owahikene kandi isyanyalya oko meza y'omukama?
19. Busana nakyi Paulo mwathasiima emibere y'abanya Korinto babya bakaliramu oko meza y'omukama?
20. Soma "1 Abanya Korinto 16:1-2".
21. Ni kyiro kyahi ekya abakristo bahereraya omo kyiibo?
22. Ni bangahi ababya batholere erihererya?
23. Babya batholere erihererya bihi?
24. Babya batholere erihererya singahi?
25. Soma 2 Abanya Korinto 9:6-7.
26. Nyamuhanga asondire omundu oyukahereraya athi?
27. Thonda ebipindi bithanu eby'eriramiryamo.

EKY'ERYIGHA 6: EKYIRO KY'ERIRAMYA

Omo ndaghano nyihya-nyihya sithuwithemo emithondekere y'obukulhu bw'eriramyamisa, niikwa thukakanganiibawa n'ekyiro eky'omukama akathulengekanir'amo abandu biwe erihindanir'amo bakaramya. Ni kyiro kyahi?

Hali abo abakakangiraraya bathi ekyiro ky'eSabbato kyinahambirire oko mundu eriramirya mukyo. Ekyi nina kwenene? Isi busana n'erikyihano erilhuusibwa omo nzira, kandi niikwamana na 2 Korinto 3; Kolosai 2:14; Hebrania 9:16,17 a Hebrania 10:9. Omwighanirya bakabuugha bathi Paulo mwasanga-sangana na Abayuda oko kyiro kye Sabbato. Ekyi kyanabya kya kwenene, niikwa sihali aho kyikathondawa ambu ahiindana nabo omwiramyamya. Niikwa, mwasanga-sangana nabo omo mughisa w'erikangiriry'abo eriyitsutsa lya Nyamuhanga.

Neryo ekyiro kyeSabbato kyamabya isikyo kyiro ky'eriramiry'amo, kwesi ini kyiro kyahi? Thwamakubungulha esya mbapura syomo ndaghano nyihya-nyihya, thukasang'amo ebisakirwe ebilhabire oko kyighuma ebikasubiraya oko kyibuulyo ekyi. Eky'eritsuukir'ako, thukendisamalira oko ky'erilhangirir'ako ky'ekyithuunga kyabikiiriirya abahindene haghuma bakaramya neryo thukendilhangira nga ni kyiro kyahi ekyo babya bathwir'emo eriramiry'amo. Eky'erilebery'ako, Paulo abere akalengera omo muyi we Trosi, ebisakire bikabuugha bithi mwatsuuka erikyimira aho habw'ebiro bike busana n'omughisa w'erihindana n'abikiiriirya bakasaba. Lithya thuthungerere ngoko hakuabuugha: "*Neryo oko kyiro ky'eyenga muthwahindana oko meza y'omukama. Neryo Paulo mwakangiiriirya abandu, neryo mwabuugha bingyi erihiika omo kathi kanene, kusangwa aby'anzire erilhw'aho engyakya*" (Emibiiri 20:7). Ghusamalire ngoko Emibiiri 20:6 mwikalha eTrosi y'ebiro musangyu. Ekyi kyikakanganaya kyithi ne Sabbato kutse Saturday muyamwey'ayo, niikwa ebisakire sibiribuugha bithi mwasanga-sangana nabo oko kyiro ekyo, niikwa oko kyiro ekyikatsuuka eyenga kutse ekyiro ekyisubukire Sabbato. Neryo ekyikulhu ni kyahi hano? Ekyikulhu hano kyangabere kyithi mwatharamya oko kyiro kye Sabbato, niikwa eribyayo okwiramyamya oko kyiro eky'omukama abya inyabirihiraho busana n'eriramyamya iky'ekyiro ekyikatsuuka eyenga.

Niikwa ekyiro ekyikatsuuka eyenga nikyahi nibya? Niikwa, ahisi yemighambo, e Sabbato yabya kyiro ky'omusangyu omo yenga. Ekyo kyikaminyisaya kyithi Sabbato yamabya iyabya kyiro ky'omusangyu omo yenga, kandi omo yenga mukabya biro musangyu, neryo Sabbato yanabirihw'amo ihakabya kyiro ekyikatsuuka eyenga, ekyiro eky'akabiri omo yenga, nerilholya embere. Ni kwenene omughulhu ono thukahulh'amo Sunday kandi Sunday yithondire mo kyiro ekyikatsuuka eyenga.

Busana nakiy ekyiro ekyikatsuuka eyenga? Kwenene, omo Bihano bya Musa ekyiro ky'eriramiry'amo kyabya ini kyiro kye Sabbatho kutse ekyiro ek-yikahinda eyenga. Omo kyihano kya Kristo ekyiro ky'eriramiry'amo ni Sunday kutse ekyiro ekyikatsuuka eyenga. Ekyi kyikamiinyiisaya kyithi omukama syalyasa oko muhiindo niikwa oko nzuuko (Matayo 6:33).

Niikwa erilholya embere, thuminyerere oko erikwamako, omukwenda Paulo akalghahira abikiiriirya be Korinto oko kyiro bakatholera erihithya ebyo bangathoka. Thusome: “*neryo busana n'omwatsi w'erizwathiikya balikyethu abandu ba Nyamuhanga. Mukole ngoko nathegheka esyokanisa sy'eGalatia, Oko kyiro ky'ertsuuka eyenga, obuli mundu abike ekyihandi ky'enduundi akabana, butsira erilhabya ekyibo ekyiro nasyahiika*” (I Korinto 16:1,2). Niikwa busana nakiy ekyiro ekyi kisombolhwa eribya kyokyiro ky'erihithiry'amo? Ni busana inikyo kyiro ky'eriramiry'amo kandi ngoko bangabya ibamasanga-sangana ikyabya kyiro kyitholere erigh-abir'amo eky'ebyo babirithunga. Lithya, omo kwenene kukyabya ikyekyiro kye Sabbatho, Paulo syangabere inyakabasaba erithasya sanga-sangana oko kyiro ekyisubukire ekyo bakaletha eby'rihithya. Oko lhuhandi olhundi, abo abakakangiriraya bathi ekyiro ky'eriramy ni Saturday, bakanasubulha kandi kyiro kya Sunday eryolhobera ekyihano kya nyamuhanga ekyihambire okwi-hiithya? Kyamabya isibiri bithya, busana nakiy?

Hanyuuma waho Yohana mwakania oko kyiro ekyikatsuuka eyenga ng'ekyiro ky'omukama. Mwabuugha athi, “*Oko kyiro ky'omukama, omuliimo mwambikako, neryo munowa omulenge munene ng'omulenge w'engubi akabuughira enyuuma kwingye.*” (Eribisulirwa 1:10) Ni kwenene omo bulengekania bughuma, buli kyiro nikya Omukama niikwa Yohana akatholera eribya inyakanaya oko kyiro ekyi omo musiindo w'engabane. Ekyiro ky'omukama hano, kyangab-ya ikyakanaya oko kyiro ky'eriramiry'amo kutse ekyiro ekyikatsuuka eyenga. Bithe bithya, busana nakiy mwahulh'akyo mo kyiro ky'omukama?

Niikwa ekyiro ky'eritsuuka eyenga ni kyiro kyikulhu kyithyi? Thwamathwalhwa oko nzumwa, kukyabirilhangirwa eyenga iyabya ahighul-hu, kyikalengekanibawa omwibindulha ebihano kandi omukama niweribya oko nzuuko, hali nzuumwa nene esikaleka ekyiro ekyi ikyabya kyiro kyikulhu.

1. Kristo mwalhubuka oko kyiro ekyikatsuuka eyenga.

Omo ngyakya y'erihumbuka, ebisakire bikabuugha bithi, “*neryo enyuuma w'ekyiro kye Sabbatho, ekyiro ky'eritsuuka eyenga kyabere kyasonda erikya, Maria Manga-dalene n'ghundi Maria mubayalebya eyisinda. “neryo omwigholho-gholho ly'ekyiro ekyo, eky'eritsuuka eyenga, abigha mubahiindana omo nyuumba n'esonyuuyi isinakyingire, bu-sana n'eryubaha abayuda. Neryo Yesu mwasa, mwahangana omo kathi-kathi kabo. Mwab-wirabo athi, obuholho okwinywe*” (Yohana 20:19).

2. Yesu mwababuthukira oko bigha kandi oko kyiro ky'eritsuuka eyenga.

Yesu mwathalhwa omwiyisinda oko kyiro ky'eritsuuka eyenga kyisa, kandi mwabatsubukako ahanyuuma oko kyiro ikyanekyo, niikwa kandi hano kyikaswekaya eriminyanya ghuthi kandi mwabatsubukako oko kyiro ekyikatsuuka eyenga. Hakabuugha hathi, "*neryo enyuuma w'ebiro munani abigha biwe babya omo nyuumba, na Toma haghuma nabo. Neryo Yesu mwasa esyonyuuyi isinakyingire, neryo mwina ahabali, mwabuugha athi, "obuholho bubye okwinywe"* (Yohana 20:26). Yesu amabya imwatsubuka oko bigha biwe oko kyiro ekyikatsuuka eyenga, neryo enyuuma w'ebiro munanani kandi inyathasyabatsubukako, ni kyiro kyahi kandi ekyangasire sasya bahikako? Ekyiro ekyikatsuuka eyenda. Busana nakyi amasako inyasubiriramo athya? Kusangwa kyabya ikyikayabya kyiro kyikulhu omo kyihano kya Kristo. Kyabya ikyikabya kyiro ky'eriramiry'amo.

3. Ekanisa yatsuuka oko kyiro ekyikatsuuka eyenga (Emibiri 2).

Ekyiro kya Pentekote mukyabyaho ebiro makuumi athano byabere byabirihaba erilhabw'ako lyabiribya, nekyiro omukama olhubukibawa erilhwa omo yisinda. Omukama amabya inyallhubukibawa oko kyiro ky'eritsuuka eyenga neryo Pentakote muyasa ebiro makuumi athano hanyuuma, neryo ni kyiro kyahi ekyo Pentekote yangasiremo? Ekyiro ekyikatsuuka eyenga. Niikwa ni bukulhu bwahi obuli oko kyiro kye Pentekote? Lino ni kyikulhu erilhangira ngoko kyasa oko kyiro ky'eritsuuka eyenga kandi oko kyiro ekyi ekanisa y'omukama wethu ky'ekyiro yatsuuka. Sibusana nekyo kyisa, ni bikulhu-bikulhu bingyi ebyabya byabere oko kyiro ky'eritsuuka eyenga engendo y'erimbere-mbere, kandi ebindu ebi ebyosi bikakanganaya obukulhu busana n'ekyiro ekyi. Eky'erilhangirirako, omuliimu Abuyirire asa oko kyiro ekyi, erithuulira ery'erimbere-mbere lyabya oko kyiro ekyi, emithima y'abikiiriirya emyolho-myolho muyalhamiibwa n'erithomekerwa oko kanisa omo kyiro ekyo. Nokweryo, ekyiro eky'ebindu bino byabanikiramo sikyangalhabibwamo ameso.

Ni kwenene lino thukiikiiriiraya thuthi omukama abisombolha ekyiro ekyikatsuuka eyenga eribya kyiro busana n'abandu biwe erihindaniramo n'eriramya. Busana n'eky'erilhangirirako eky'abikiririrya ab'erimbere-mbere erihindahindana oko kyiro ekyikatsuuka eyenga, kandi n'erilhagirwa lyabo erihithya oko kyiro ekyi, ekyi kyangalhuusyaho erithika-thika lyosi eryabya eryabiribyah. Wibuke, omukama niweribya w'erimbere omwiramya kandi nomo bindi bindu byosi. Busana n'ekyi, obuli kyiro ekyikatsuuka eyenga abikiiriirya nib'erihinda-hindana busana n'eriramya n'eryibuka oyuwabaholera kandi oyuwalhubuka busana nabo oko kyiro ekyikatsuuka eyenga.

EBIBUULYO

1. Ekyiro ky'eriramiryamo ni kyikulhu?
2. Omukama anabirisombolha ekyakalengekanirayamo abandu biwe eriramyamya?
3. Ekyiro ky'esabbato kyikyine kyikulhu?
4. 2 Korinto 3, Kolosai 2:14; Hebrania 9:16,17; Hebrania 10:9; na Luke 24:44 hakaka-ngiiriiraya hathikiyi?
5. Busana nakiyi iyo Paulo mwasangasa-ngana na Abayuda kyiro kya Sabbato?
6. Abikiiriirya bahiinda-hiindana oko kyiro kyahi omwa Emibiri 20:7?
7. Ekyiro kya Sabbato kyamabya inikyo kyiro ky'eriramiryamo niikwa ni busana nakiyi abigha isibalisanga-sangana oko kyiro ekyo kandi ibakasanga-sangana oko ky'eritsuuka eyenga?
8. Ekyiro ekyikatsuuka eyenga ni kyahi ?
9. Busana nakiyi ekyiro ekyikatsuuka eyenga kyokyabya kyasombwerwe mo kyiro ky'eriramiryamo?
10. Buugha ekyiro abikiiriirya be Korinto babya b'erihindanamo busana n'erihithya ngoko babya bathokire?
11. Thonda ekyiinywa "ekyiro ky'omukama" nga kyikaminyiisaya kyi? 12. Ekyiro ky'eritsuuka eyenga ni kyiro kyikulhu kyithi?
13. Ni kyiro kyahi ekyo yesu alhubikiramo erilhwa omw'isinda?
14. Pentekote muyasa kyiro kyahi?
15. Thonda ebindu ebyabya byabere oko kyiro kye Pentekote.

EKY'ERIGHA 7: ENDONDEKANIA Y'ERIRAMYA

Omo kyihugho kyino eky'ebisomo muli eriramyamya lya misiindo mingyi. Abakatoliki bawithe riramyamya lyabo ly'engabane kandi nibya n'omo bisomo byabahakani (protestant churches) bawithe ndondekania nyingyi eyo bakwamire. Ekyi kyikamiinyiisaya kyithi mwangabuugha esye yenga n'esayayenga ighunemughenda omo myanya yithe yamuthiina mughuma ighunemusangayo erimya lya misiindo yithasosene. Ekyi ni busana nakiyi? Omukama kwayisunzire athya?

Biblia yikakangiiriiraya yithi hali Kanisa nguma kandi niy'omukama. (Efeso 4:4; Matayo 16:18). Endondekania y'ekanisa yiri omo Ndaghane Nyihya-nyihya. Okwenene kwekyi, kandi ngoko ni kanisa y'omukama ey'eriramiryamo, neryo Endondekania yikatholera iyabya ngumerera.

Thwamanza eribulirirya omukama ngayitsutsire abandu biwe ibaramya bathi munabwire thughende omo Ndaghano Nyihya-nyihya. Sihali yindi nzi-

ra ey'eriminyiramo. Thughende omo ndaghano nyihya-nyihya thukendiminyanga ngoko omukama ayisunzire eriramyari eribya. Thukasangayo ebindu bino:

1. Nyamuhanga y'oweriramyari. Yesu akalengwako n'enzighu, mwabuugha athi: *“wasyaramya Omukama Nyamuhanga wawe, kandi wasyamukolera musa”* (Matayo 4:10).

2. Ekyiro ky'eriramyari ky'ekyiro ky'eritsuuka eyenga. Abigha mubalhanghirwa erihindana oko kiro ky'erimbere omo yenga eritheka omwa kibo: *“oko buli kyiro ky'eyenga, obuli mudi abike ekyihandi ky'endundi akabana, butsira erilhabya oko kyiro nasyahika”* (I Korinto 16:2).

3. Abiikiiriirya nib'eriramyari omukama. Thunawithe eby'erilhangirirako: *“Neryo mubasiba bakigha erikangiiriirya ly'abakwenda n'eribya bughuma nabo. Kandi babya bakahiika oko meza y'omukama n'okwisaba.”* (Emibiri 2:42). *“Neryo oko kyiro ky'eyenga muthwahindana oko meza y'omukama. Neryo Paulo mwakangiriirya abandu, neryo mwabuugha bingyi erihika oko kathi k'ekyiro, kusangwa abya anzire erilwaho engyakya”* (Emibiri 20:7).

4. Thukabwirawa ngoko thwangaramyari.

Yesu mwabuugha, *“Niikwa omughulhu akasa, kandi lino ane, abaramyari b'ekwenene basyaramyari thatha omo Kirimu n'ekwenene, kusangwa Thatha akasondaya abandu abali bathya eribya baramyari biwe”* (Yohana 4:23,24).

5. Ebindu 5 eby'omwiramyari bilhangirikire bithya.

Ebi birimo eryigha Biblia (2 Timoteo 2:15), erisaba (Emibiri 2:42), eryimba (Efeso 5:19), erirya oko meza (Matayo 26:26-28), n'erihithya (2 Korinto 9:6,7). Eyi y'emibiiri eyo thukighako omo Ndaghano Nyihya-nyihya. Nokweryo thukatholera ithwaghendera omw'ebi bisa.

6. Thukabwirawa eribya bandu bakwenene omwihindana omwiramiryo.

Omusakangyi omu Hebrania mwabuugha athi, *“erithendilekerania erihindana n'abandi ngoko abandi bakakolha; niikwa erihererania omuuhwa obuli mudi oko munyikyawe, nakwilhabaho ekyiro erilhaba”* (Hebrania 10:25).

7. Omusindo w'eriramyari olhobire kandi akabereraya ekyilhubirirwa.

Eriramyari sikiyindu kyikalire. Abosi bakakokibawa eriyitsungiramo.

8. Endekatheka eyosi yihandire okw'ikangiririya ekyiinywa ky'omukama.

Thukakanaya okwilhaghira ly'omukama. (Petero 4:11). Sihali ekyikakolhawa ghuthathabuugha ghuthi; *“omukama kwakabuugha athya”*.

Ekanisa ya Kristo niya ngabane omwikwama-kwamania endaghano nyihya-nyihya. Nokweryo sithuwithe bindu birebe omwiramyari eby'ebindi bithunga bitha. Eky'erileberyako sithuwithe bino:

1. Sithuwithe eryimbisya obyuma. Endaghano nyihya-nyihya kwenene yikakangiriraya yithi thuli b'eryimbira Nyamuhanga erimuhalhamba. Pau-

lo akabuugha, “*eriyikanirya omo mirenge n’omo nyimbo sy’omuliimu, eryimba n’erighusa emirenge n’omo mithima ew’omukama*” (Efeso 5:19). Thukendithasyabuugha binene embere omo ky’eryigha ekyihambire okwiimba.

2. Sithulisombolekanaya nga nindi oyutholere erirya oko meza y’omukama obuli mwikirirya akalya. Niikwa Paulo mwasakangira aba nya Korinto, athi, “*Omundu ayitswere, neryo alye oko bundu obo n’eripuulya oko lhuthehi*” (I Korinto 11:28).

3. Sithulitheka ekyighuma ky’omwiikuumi. Kandi Paulo mwasakanga athi abikirirya bahiithaye ngoko balyabana. (I Korinto 16:2).

4. Sithusonga-songaya bindu hathe omwo kyiro ky’omukama. Ebithuunga bingyi bikathunga erisongya-songya lighuma kutse ngendo nene obuli mughulhu bakahindana, kibye kyiro ky’eritsuuka eyenga kutse eyihi. Niikwa abiikiiriirya bakalhaghirawa erihithya oko kyiro ky’erimbere ky’eyenga. (I Korinto 16:2).

5. Sithuli thunga ebithunga by’erimbiramo eryimbira omwiiramya. Amasako akakangiriraya athi obuli mwikirirya akatholera inyimba nokweryo thukathunga eryimbira hayiima lisa. Paulo, mwabuugha, “*Neryo ngandikolaki kwehi? Ngandisaba omo kirimu kyaghe, kandi ngendisaba omo bulengekania bwaghe nibya, Ngendisayimba omo kirimu kyaghe, kandi ngendisayimba omo bulengekania bwaghe nibya*” (I Korinto 14:14,15).

6. Sithuli thunga biro by’eriramiryamo by’engabane nga pasika, Christmas, nebindi. Paulo mwakunga abikiiriirya be Galatia, “*Mukakwama ebiro n’emikera n’ebirimo n’emyaka. Ngubaha busana nenyu, nyithi mbino nabiri balhuhira busa*” (Galatia 4:10,11).

7. Sithulithunga emeza ya Thatha ngendo nguma obuli kwezi, obuli mezi asathu, kutse omwaka. Thukathunga emeza y’obuli Sunday kutse obuli kyiro ekyikatsuka eyenga. Thukasoma aho ekanisa eyatsuuka yabya yikakolha yithya. (Emibiri 20:7). Kyiro kyahi eky’erimbere omo yenga? Oyuhebirwe obuthokyi bw’eribuugha buthya nindi? Obuli yenga muli ekyiro ekyikatsukayo neryo esyo syongendo thukahiindaniramo oko meza. Thukahiindana erighabana oko meza ng’esyangendo esyothukahindaniramo thukahiithya, eryigha, n’ebindi.

8. Sithulilhaba omo mikonga busana n’eribya ini mikonga buyira, emirwa, thukaramya omukama. Petero mwabuugha, “*Kusangwa munasi mumutha-thon-goliibwa oko mitsye mithya-mithya n’emighendere y’abothatha-kulhu wenyu, omo bindu ebikahera, ng’ebitsipa kutse esy’amaghetse.*” (I Petero 1:18). Paulo akathomekako athi, “*Muyitheghaye, sihabye mundu oyukabanyegha omo munge w’abandu n’eritheba buyira erikalhwa oko mitsye y’abandu, noko myatsi y’ebirimo ebikathabalha oko bihugho, eyithelhwa oko Kristo*” (Kolosai 2:8).

9. Sithulikwama erikangirirya nn'ebihano by'abandu. Omukwenda mwasakanga athi, *“Mwamabya imwabiriholha haghuma na Kristo oko mitsye y'abandu n'ey'abaliimu, abakathabalha oko bihugho, busana nakyi mukyinakwama ebihano n'ama-lengekania w'ekyihugho kwehi? Bati, suwate okweki, kutse sugeraye kirya, kutse sutule okweki. Ebyosi ebi, bikahera omwikola lyabyo kusangwa ni bihano nerikangirirya byabandu”* (Kolosai 2:20-22).

10. Sithukwama ebihano by'omo ndaghano engulhu thukaramya. Abangyi bakaghendera okw'ebyo nge Sabbatho, erisubulya ekyighuma ky'omwikuumi, eryimbisya ebyuma, n'ebindi, niikwa eri nikolesya ekyihandi ky'amasako kyo nabi. Ebihano sibikiyambirire. (2 Korinto 3; Hebrania 10:9; Yohana 1:17).

Nokweryo thuli b'erikwama endaghano nyihya-nyihya omo musiiindo wayu isihali thomekerako, erilhusyako, kutse eribindulha ebindimw'ebindi. (Eribisulirwa 22:18,19; Galatia 1:7-9). Kyikakangiriraya ndeke abandu emibiiri mibuya. (2 Timoteo 3:16,17). Ebindu byosi ebiahambire oko ngebe n'obwa Nyamuhanga bikasangawa omo papura esyo. (2 Petero 1:3).

Abandu abosi bamasuba oko ndondekania eyi omwiramya, ngoko omo bindi bindu bakabuugha n'erikolha omo liina ly'ekyisomo, thwangabere ethukathunga obughuma. Ni kwenene omukama syalithanyilhaghira athi ngaramaye omo musindo oyu naghuma omumusindo olya. Niikwa, angalaghire ithwebosi eriramya musindo mughumerera. Ithwebosi thwangaramya omo musindo mughuma thwamakwama Endondekania ngumerera eyo abirithuhererya.

EBIBUULYO

1. Busana nakyi hali emisiindo mingyi ey'eriramiryamo?
2. Ni makanisa mangahi awo thukasomako omo Biblia?
3. Ekanisa ni yandi kwehi?
4. Endondekania y'ekanisa thusangana yo hayi?
5. Eendondekania y'eriramya ni yahi?
6. Nindi ow'eriramya?
7. Buugha ekyiro ky'eriramya.
8. Buugha nga nindi ooyutholere eriramya Omukama.
9. Thukatholera ithwaramya thuthi?
10. Thukaramya omubindu bitano byahe ? .
11. Busana nakyi sithukolesya ebyuma omw'iramya?
12. Ni ngendo singahi esyothukatholera erisongya-songeryamo eby'erihiithya?
13. Ni kyihy ekyithere omwikolha ebithunga eby'erimbiramo omo Kanisa?
14. Busana nakyi sithuwithe ebiro bikulhu eby'eriramiryamo nga Krismas

ne Pasika?

15. Ni ngendo singahi esyo abikirirya bakaliramo oko meza y'omukama?
16. Engangirirya n'ebihano by'abandu ni byahi?
17. Abandu b'omukama bakanakwama endaghano engulhu ng'ekihano?
18. Endaghano nyihya-nyihya niy'erithwalha thuthi?
19. Kyinathokekene erithunga obughuma omo bisomo?

EKY'ERYIGHA 8: ERYIGHA BIBLIA

Ekyighuma oko bindu by'eriramiryamo 5 ebisakangire omo Ndaghano nyihya-nyihya ly'eryigha Biblia. Thuwitheyo isibusana n'erilhagirwa niikwa busana n'eby'erilhangirirako ngoko abikirirya ab'erimbere byabya bakahiindana bakigha ebihambire okwiramya omukama.

Eryigha Biblia lyangabya oko mughulhu ghosi-ghosi busana n'omundu muguma kutse abanene, niikwa hano thukalengekanaya kukyo omo bulengekania kwilhabirirya obwoko kyiro ky'eritsuuka eyenga ng'ekyihandi ky'omyatsi y'eriramya. Omwikolha thuthya, omukama akathukaniraya erilhaba omo kyinywa kyiwe.

Ekyihandi ekyi eky'omwiramya thwangahika mukyo erilhaba omwigha amasako kutse erilhaba omw'ibwirwa omuthuuliiri akakakania oko kyinywa kya Nyamuhanga. Omo Emibiri 20:7 tuwithe Paulo akathuulira oko balikyabo eTroasi oko ndambi yabo ey'erihindana okwiramya. Omo Emibiiri 17:10-12, thukasoma, “*Neryo abalixwethu mubathuma Paulo na Sila omo kyiro eBeroya. Neryo babere babirihikayo mobaya omo nyuumba y'erihindanamoy'aba Yuda. Niikwa abandu be Beroya babya bandu babuya kwilhaba abandu be Tesalonia. Mubangirira ekyinywa kya Nyamuhanga n'omuuhwa, ibakasondaya omo masako obuli kyiro erirebya emyatsi eyi nga ni nakwenene. Neryo abangyi kwibo mubikiiriirya, abakali b'Abagiriki abasiikiibwe n'abalhume b'Abagiriki.*” Yesu mwakangiiriirya, “*Mukasoma amasako, kusangwa mukaghaniraya muthi muwithe engebe y'erikotha. Kandi amasako ayo akathulhagho busana naghe!?*” (Yohana 5:39).

Paulo mwakania ndeke oko mukangirirya omulere Timoteo, “*Uyire omuuhwa erisiimwa embere sya Nyamuhanga ng'omukoli w'omuubiiri oyuthehemuka busana n'omuubiiri wiwe. Kandi oyukakangiriiraya ndeke-ndeke omwatsi w'okwenene wa Nyamuhanga*” (2 Timoteo 2:15). Kristo mwabuugha, “*Obutseme buli n'abanzire kutsibu erikolha ekyithunganene ekyo Nyamuhanga anzire. Kusangwa Nyamuhanga asyaha kyobo ndeke.*” (Matthew 5:6). Kandi mwathasya buugha, “*Omundu syendisabyaho busana n'obundu ibobwene, niikwa busana n'obuli kyinywa ekyikalhwa omo buno bwa Nyamuhanga*” (Matthew 4:4).

Ni kyindu kyikulhu erilhangira thuthi sithulyigha lisa niikwa eryigha

ebitholere. Omo musiindo iwan'omughuma, okwikangirirya ebyo thukowa. Omukwenda Paulo akabuugha athi, *“Liithya eryikiiriirya likasa busana n'eryowa, neryowa likasa busana n'erikangiiriiribwa, n'erikangirirya eryo ni Kristo”* (Baroma 10:17). Ekyi kyikamiinyisaya kyithi, thwamowa ebithere thukikiiriirya ebithere, kandi kwilhabirirya thuthathabulirirya kukyo. Niikwa thwamowa okwenene neryo thukendikiiriirya okwenene ng'buli kyiro.

Nyamuhanga abiribuugha omo mughulhu ono kandi abirithubwira erilha-ba omo mughalha wiwe Yesu Kristo. (Hebrania 1:1,2). Oko kyithwa ky'erib-indulhwa, Nyamuhanga iyuwene-wene mwabuugha oko Yesu, athi *“oyu ni mughalha waghe mwanze, namamutsemere ndeke; mumwowe!”* (Matayo 17:5). Nibya, Kristo abya akakania ebiinywa bya Nyamuhanga. *“Yesu mwamusuubirya athi, omundu amanyanza, asyakenga ekyiinywa kyaghe: kandi Thatha waghe asyamwanza, nethu thwasyamuhikako ithwakokothya obw'ikalho bwethu haghuma nayo. Oyutanyanzire syalikenga ebiinywa byaghe. Kandi ekyiinywa ekyo mukowa si kyaghe, niikwa nikya Thatha oyuwanyithuma”*. (Yohana 14:23,24). Neryo ekyiinywa ekyi mukyasakangwa: *“Yesu mwakolha ebindi bithiko-thiko bingyi embere sy'abigha biwe, ebithasakire omo kyitabu ekyi. Niikwa ebi bisakire imwathoka eryikiiriirya Yesu kw'ali Kristo, omughalha wa Nyamuhanga, neryo imwiikiiriirya eri imwabana engebe omo liina liwe”* (Yohana 20:30-31). Erithomeka oko, amasako ghozi asakirwe okwilhaghira lya Nyamuhanga kandi akalhol-haya omundu y'okwikolha emibiri yowene, eribya kyihano ky'obwiranda. (2 Timoteo 3:16, 17; Yakobo 1:25).

Erilhangira erilholya embere ko ni kwenene, neryo hali nzumwa nene esikaleka itwahindana okwakiro kyo mukama, eryigha ekyiinywa kyiwe:

1. Thukatholera ithwakolha thuthya kusangwa ni kyiinywa kya Nyamuhanga. (Hebrania 13:7 ; I Petero 1:23; Efeso 6:17). Kani ky'eriswekyia erilhangira omukama syalithathusigha omo mwirimya niikwa abirikangania eriyisunza liwe okwithwe.

2. Thukatholera ithayisunza eriminye ekyo Nyamuhanga ayisunzire kyo ndeke (Emibiri 13:7). Neryo kyiri okwithwe erisoma thukabya n'eryigha. Omukama abirithuhererya obulengekania obukakolha neryo thuli berisoma n'eryigha imo thwaminye eryanza lya Nyamuhanga busana nethu.

3. Thukatholera eryigha bithe bithya ithukendithebibwa (Efeso 4:14; Efeso 5:6; Yakobo 1:22). Ni bingyi ebikakangiriibawa omo liina lya Kristo. Thwangaminye thuthi nga ni kwenene kutse eyihi? Erilhabya omwisunzikanianebithukowa omo kyiinywa kya Nyamuhanga. Yohana mwahererya amenge athi, sithwikiriraye obuli kyiriimu erilebya ngakyikalhwa oko Nyamuhanga kutse eyihi. (1 Yohana 4:1). Sihali ekyangaleka omundu inyathebiba amab-

ya inyanalholya embere n'eribulirirya omo kyiinywa kya Nyamuhanga.

4. Thukatholera eryigha erihika aho nethu thwanganathokera erikangirirya abandi. Paul mwabuugha athi, "*Uyitheghaye kandi ghutheghaye erikangirirya lyawe. Kandi uyitsinge omo mwatsi eyi, kusangwa wamakolha ghuthya wasyayuilhamya haghuma n'abakakuhulikirira*" (I Timoteo 4:16). Ebihambire oko bikiriirya abat-suuka, omwatsi ali athi, "*neryo abapanzikana mubaya eyi n'eyi bakathuulha engulhu yowene*" (Emibiri 8:4).

Omwisuba oko ky'eryigha kyethu, namanza thusube enyuuma omo 2 Timoteo 2:15 aho Paulo athi thukatholera ithwigha imothwathoka erighabulha ekyiinywa ky'okwenene. Omwigha lyethu ekyo kyatukole. N'ibuugha ambu, thukendisangana Biblia iyighabiremo endaghano engulhu n'enyihya-nyihya. Thukendyigha ngoko endaghano engulhu yirimo ebihano by'abathatha-kulhu hayiima n'ebya Musa, ebyosi ebi ebithakwikwamawa, neryo n'endaghano enyihya-nyihya iyabyamo ebya Kristo. Omo musindo oghundi, ekyihandi ky'endaghano engulhu kyikasangawamo emyatsi eyihambire oko bandu Yesu athe aholha. Ekyo kyileka ihabya engulhu n'enyihya-nyihya. Niikwa ithwe thulihi kwehi? Ng'buli kyiyo, ngoko thuliho omo lhuhandi lhw'omusalaba, neryo thuliho omo kyihano kya Kristo ngoko bisakire omo ndaghano Nyihya-nyihya. (Hebrania 9:16,17; Hebrania 10:9).

Neryo hali ekyibulyo nga thukiririraya endaghano engulhu eribya kyiinywa kya Nyamuhanga. Erisubiirya liri lithi inga. Nomokine kyithya, ng'ekyihano sikiyikyiri ky'erikwamwa nethu hayiima n'abandi kuthya .Neryo busana nakyi ithwigha ebiri omo ndaghano engulhu? Busana n'esyanzumwa nyingyi:

1. Eryigha oko buhangiki noko nzuuko y'ebindi bindu.

2. Eryigha oko byakera by'omundu na Nyamuhanga nga mwamukolha kyi.

3. Kusangwa Paulo mwasakanga athi byasakawa bisyabya by'erilhangirirako. (I Korinto 10:6). Omukwenene mukasangawa eby'erilhangirirako bingyi.

4. Ngoko mukasangawa emisingyi minene eyo kwenene ngoko yanabya omughulhu yathekawaho, niikwa siyiwithe ekyo yihambire oko kyihano.

5. Imo thwathoka erilangira ngoko thuli omo kyihano ekyibuya kwilhaba kandi thuwithe amaha mangyi. (Yohana 1:17).

Erithuwathikya omwigha ekyiinywa kya Nyamuhanga kyo ndeke, n'erigh-abulhakyoyi, hano hali eby'erighenderako:

1. Usome omulhondo w'ongendo the-the-the.

2. Usome ndeke olhughano kolhutsukire.

3. Oyukakanaya nindi?

4. Akakaniraya ndi?

5. Kyabuughawa mughulhu wahi?
6. Ni musyo kutse kyithwere ngoko kyinasamalirwe.
7. N'erilhayira?
8. Kyinahambene n'omulhamo wethu?

Hayiima, eby'erikolesya ebi byanganakuwathikya omo ky'eryigha kye Biblia: eribindulha the-the-the ly'ebiblia, ekyitabu ekyikasobolhaya Biblia, commentaries,, n'ebindi bitabu. Niikwa omo byosi, usome n'eryigha Biblia iwabiri saba. Bangyi banasi omo Biblia mo binene niikwa sibasi omwatsi owahekereniemo.

Omughulhu iwe naghe thukakolha ngoko omukama akasonda ithwakolha neryo thukahiindana n'abandi oko kyiro ky'eritsuuka eyenga busana n'eryigha, neryo thukendithunga eriminye amenge w'eBiblia awakendithuwathikya erikulha n'erikulha- kulhana ng'abikiriirya. Ithwabosi thamakolha thuthya neryo ekanisa yikendikulha, neryo ithwangana kulhulha abanyikyethu banya bisomo thuthi ky'ekyiinywa kya Nyamuhanga ekyikathulhamaya n'erithusanga-sangania.

EBIBUULYO

1. Nindi ow'eryigha eky'eryigha omo biblia?
2. Thwangowa thuthi ekyiinywa kya Nyamuhanga?
3. Abandu be Beroya mubabya bathi babuya kwilhaba abe Tesalonika?
4. Yesu mwabuugha athikiy omo Yohana 5:39?
5. Omo 2 Timoteo 2:15 hakabuugha hathikiy?
6. Ni wahi oyo Kristo abuugha athi asyabya wa mughisa n'eryusuuliibwa?
7. Omundu anganabyaho busana n'obundu busa?
8. Erikiiriirya likasa lithi?
9. Hangabya kyi thwamowa ebithere?
10. Nyamuhanga akakanaya n'obandu omo musindo wahi?
11. Busana nakiy erikangirirya lya Yesu mulyasakangwa?
12. Soma 2 Timoteo 3:16, 17 na Yakobo 1:25.
13. Thonda esyonzumwa esyangaleka ithwahindana busana n'eryigha.
14. Erighabulha ndeke ekyiinywa kyikamiinyiisaya kyi?
15. Sakanga ebihano 3 ebisakire omo Biblia.
16. Thukalenderera omo kyihano kyahi?
17. Endaghano engulhu yinemo ekyiinywa kya Nyamuhanga?
18. Busana thwigha endaghano engulhu?
19. Thonda ebilhayiro by'eryighiramo Biblia.
20. Ni by'erikolesya byahi ebindi ebyangathuwathikya thukigha ekyiinywa

kyiwe?

21. Amenge awali omo Biblia akendithuwathikya athi?

EKY'ERYIGHA 9: ERISABA

Ekyindi ky'erikola omwiramya erye ndaghano nyihy- nyihya, ly'erisaba. Abikirirya abatsuuka banabya bamahindana okw'iramya, erisaba ni kyighuma kyoko bindu babya bakakolha. Hanyuma ekanisa yabya imuyanamabiritsuukwa, ebisakangire bikabuugha bithi, “*neryo mubasiba bakigha erikangirirya ly'abakwenda n'eribya bughuma nabo. Kandi babya bakahika oko meza y'omukama n'okwiisaba*” (Emibiri 2:42). Minyerera, “n'okwiisaba”, erikangania erihama eryathekawa oko kyihandi ekyi ky'omwiramya.

Ekyinywa erisaba kyikaminyisaya eriyithonganirira, erithondogholha, erisibiririrya kutse erikania n'omukama. Sikwamibya kyihandi ky'omwiramya lyethe lisa, niikwa kandi ni kyihandi ky'omo ngebe syethu esy'obuli kyiro. Paulo mwasakanga athi, “*Musabe kutsibu n'eribuulya Nyamuhanga eribawathikya. Kandi musabe omo mighulhu yosi ngoko omulimu Abuyirire akabasondolha. Busana n'omwatsi oyu, muyitheghaye imunemuyitsingirira, imunemusabira abandu bosi ba Nyamuhanga.*” (Efeso 6:18). Kandi akathasya buugha, “*Musabe obuthalekerera.*” (2 **Te-salonika 5:17**). Ekyi omubikuuhi kyikamiinyisaya omundu akatholera eribya n'omuthima w'erisaba.

Thalengekania oko ky'erigha kyikulhu ekyi, thuthathonda esyazumwa ngulhu-ngulhu:

1. Erisaba ni kyamubongo oko mwikiiriirya kutse oko bana ba Nyamuhanga.

Ekyi sikyirimiinyisaya kyithi oyuthe mwikiiriirya syangasaba, isyasaba, niikwa amasako akathonda ndeke athi erisaba nimughisa owakabya inyaliho busana n'omwikiiriirya. Thukasoma, “thunasi Nyamuhanga syalyowa abakakolha nabi; niikwa omundu amabya akalenga Nyamuhanga, n'erikolha ebyanzire, Nyamuhanga akamwowa”. Samalira ebikayiitsutsawa imo Nyamuhanga inyowa erisaba – akatholera inyabya oyukaramaya Nyamuhanga kandi oyukakolha erisonda lya Nyamuhanga. Oyo nindi? Eryo y'omwikiiriirya. Erithomeka oko, omubihya angasaba kyi nibya? Syangasaba athi omukama amubuyire amalholho wiwe kusangwa kristo mwabuugha athi omundu akatholera inyiikiiriirya neryo inyiibiikwa omo magheste imwalhamiibwa. (Marako 16:16). Syangasaba busana n'eryikiiriirya kusangwa amasako ah-ereribawa eriletha ekyo. (**Yohana 20:30,31**). (**Baroma 10:17**). **Nibya syangasaba busana n'ekyindi kyindu kyahi iyo ng'omubihya.**

Thwamakubungulha endaghano nyihya-nyihya omo masako awaka-

kanaya okwisaba, thukendisangana awosi inyakasamalira oko mwikiiriirya. Omwikiiriirya ni mwana wa Nyamuhanga erilhaba omo bwowa (Galatia 3:26,27), nokweryo akabirikira oko Nyamuhanga iyo Thatha wiwe. (Baroma 8:15). Obuli mundu amahika oko Nyamuhanga erilhaba omwisaba n'omwikiiriirya anemubiihya, neryo ni muthambo wahi ow'omwikiiriirya angathungire erilhabya oko mubiihya? Ko bithya wasamalira omo kwenene, ukelhangira ghuthi omwikiiriirya awithe omughisa owakalhangirika ow'erisaba ogho omuubiihya athawithe, neryo oyu w'omughisa awakalhwa oko Muliimu owakasira abikiiriirya (Efeso 1:3).

Thuwithe emibere eyiri omumyanya minene munabwire, omubiihya erisabira erighanyirwa amalholho wiwe neryo inyabya mwikiiriirya. Liriryo, ekyi sikyikwamene n'erisonda lya Nyamuhanga niikwa in'ikangirirya ly'abandu.

2. Emisabe yethu niy'erilholerya eyiri Nyamuhanga erilhaba omo Kristo Yesu. Nyamuhanga yo Thatha kandi yukaghaba emighisa eyosi. Kyikatholera thwamamubirikira erithuwathikya kandi n'erimusiima busana n'emighisa ayabirithuha. Nomokyine kyitya, sithwangakangara Nyamuhanga kusangwa ekyibi kyabiryasa omwithwe. Oko lhuhandi, ekyi sikyimiinyisaya ambu thusamalire obuwathikya erilhwa eyiri mundu-tswiri, nomwangabya iniwa kyitsumbi kyingahi omo ngebe, thuthi iyo yukendithuthonganira. Omo mwanya w'ekyi, Yesu yo musangania wethu, oyukathubuughira, omuthonganiiriiri wethu, eyo musa yothwangahikiramo omo bwami bw'olhukogho. Thuhulikire oko kyinywa kya Nyamuhanga; “inywe abana baghe balere, ngabasakira emyatsi eyi, isimwakolha ebibi. Niikwa omundu amakolha ekyibi, thuwithe Embbuyi oko Thatha, iya Kristo oyuthunganene. Kandi Kristo ni mbanulho busana n'ebibi byethu, kandi sibusana n'ebibi byethu bisa, niikwa busana n'ebibi by'ekyihugho kyosi. (I Yohana 2:1,2). Kandi, “*kusangwa hali Nyamuhanga mughuma, n'omusangania mughuma, oyo kasanganaya Nyamuhanga n'abandu, omundu oyo ni Kristo Yesu*” (I Timoteo 2:5). “*N'okeryo, thutholere itwasaba omulina kutse omubuthokyi bwa Yesu Kristo.*” (Matayo 28:18).

3. Thuli beri saba omo muliimu n'omo kwenene. Thwabiriminya omo by'erigha ebyenyuuma ngoko omukama abiribuugha, athi thukatholera ithwaramya Nyamuhanga omo muliimu n'omo kwenene. (Yohana 4:24). Ngoko erisaba ni kyihandi kyokw'iramy, kandi engebe y'omwikiiriirya ey'obuli kyiro, neryo erisaba lyethu niryeribya omo muliimu n'omo kwenene. Paulo mwasakangira aba Korinto athi, “*Kusangwa nomo nangasaba ebiinywa by'emisiindo-misiindo, ekyirimu kyaghe kyikasaba, niikwa obulengekania bwaghe sibuliminya kyindu. Neryo ngendikolha kyi kwehi? Ngendiaba omo Kyirimu kyaghe kandi ngendisaba omo bulengekania bwaghe nibya. Ngendisyimba omo kyirimu kyaghe, kandi ngendisyim-*

ba omo bulengekania bwaghe nibya.” (I Korinto 14:14-15). Ekyi kyikaminyisaya, kyithi erisaba lyethu niryeribya mw’obulengekania, kusangwa amalengekania wethu akatholera ebyothukabuugha, kandi thukatholera ithwabya bolho kandi bakwenene. Erithoka okwebyo, emisabe yethu yikatholera iyabya eyinakwamene n’amasako. Nibuugha mbu, sithuliberisaba omukama thuthi athukolere ekyitheghendera omwisonda liwe. Kristo omughulhu abigha biwe basaba erisaba ery’obukyiru, “niikwa Yesu mwasubiryabo athi, simwasi ebyo mukabulhaya. Inywe mwangathoka eripuulya oko lhuthehi olhungendi puulyako kwehi? Nabo mubamusubirya bathi, thwanganathoka. (Matayo 20:22). Kandi mwathasyabuugha “*Yesu mwabwirayo athi kisakire kyithi, kandi amasako athi, susyalenga oko Mukama Nyamuhanga waghu.*” (Matayo 4:7).

Eyi ninzumwa nguma eyaleka isithwakolesaya erisaba ly’omukama (Matayo 6:9-13). Sikyangabya ekyinakwamene n’erisonda ly’omukama ithwe erisaba obwami thuthi bwase ibwabiryasa nibya. (Hebrania 12:28).

4. Ebyothwangasaba binakangenie ndeke omo masako. Thukatholera erisaba emisabe e’yerisiima, “*Simuhangahangaye emithima yenyu, niikwa o’obuli mwatsi mubwire Nyamuhanga obwagha bwenyu, imukasaba n’erimuhathikana imunemumuha ewasingya.*” (Filipi 4:6).

Thukatholera ithwasaba omo mughulhu thuwithe obwagha. “neryo mubatheya Petero y’omo mulikiyi, niikwa abandu b’ekanisa mubasaba Nyamuhanga yo kutsibu busana nayo. (Emibiiri 12:5). Thukatholera ithwasabira abasondoli b’ekyihugho Baroma 13.

Thusabirane. (Yakobo 5:16). “*Neryo mukanganaye ebibi byenyu n’erisabirana, imwathoka erilhamibwa. Erisaba ly’omundu muthunganene likathoka omwatsi munene.*”

Thukatholera ithwasabira abakoni. “*Hali oyulhwere omukathi-kathi kenyu, kwehi? Abirikire abakulhu b’ekanisa, bamusabire, n’erimuhakabya amaghutha omo liina ly’omukama. N’erisaba eri ly’erikirirya lyasyalhamya omukoni, n’omukama asyamusuubya. Kandi amabya abirikolha ebibi, asyabuyirwabyo.*” (Yakobo 5:14-15).

Nibya thwanganaghenda emuliro thukathonda ebyasakirwe ebikananaya oko myatsi mingyi eby’obuli mundu ebyo thwangasabira. Ebi byanabya inibyerikanisa, amaka wethu, abathere, n’ebindi.

5. Amasako akakunga bindu birebe oko misabe. Kristo mwabuugha athi, “*Omughulhu mukasaba, isimwabya ng’abathebya kusangwa banzire erihangana n’erisaba omo manyuumba w’erihindanamo nomo syongendo sy’esyo mbalhu, balholhaweko n’abandu. Kwenene ngababwira nyithi, bawithe oluhembo lhabo lhwosi. Niikwa iwe, omughulhu ghukasaba, wingire omo kisenge kyawe, neryo wabirikanga olhuyi iwasaba Thatha waghu oyuli omo bubiso-biso. Na Thatha waghu ukalhangira omo bubiso-biso, asyakuhemba. Kandi omughulhu mukasaba, simubye mukasubirira omo biinywe bithya-bitha. Ngoko ebi-*

handa bikakolha kusangwa bakaghaniriiraya bathi basyowiibwa busana n'ebiinywa bya-bo bingyi. Neryo simubye ngabo; kusangwa Thatha wenyu anasi ebibali bwagha, isimuli mwamusaba.” (Matayo 6:5-8). Kandi, “kusangwa mwamabuyira abandu kwamalolo agho babiribakolha, thatha wenyu we lhubulha asyababughira nibya. Niikwa mwamathendibuyira abandi ba malolo bakabakolera, thatha wenyu syendiswabuyira amalolo agho mwabirikolha” (Matayo 6:14-15).

Oko nduuli y'emyatsi, emisabe ni mwatsi munene oghothukathwalha ng'ekihandi kighuma ky'omwiramya lyethu omo ngebe syethu sy'obuli kyiro. Niikwa ng'abiikiirirya thuwithe omughisa ow'eribirikira Nyamuhanga omo misindo yosi. Siky'ekyokya niikwa Nyamuhanga kwakathulenge-kanayako athya. Wamathungerera okwiramya, abiikiiriirya sibaky'ikalha eka bakathoka erisabirayo kandi n'erihithya oko mbulho syabo kutse erirya oko meza y'omukama. Abiikiiriirya abathehiindana neryo bakasaba sibalibabira n'eka nibya, sikyangabya erihika oho wangighira eribya muthunganene embere sya Nyamuhanga.

Erisaba ly'eryikiiriirya – ghusabe wasyahebwabyo. Erisaba niryamubongo.

EBIBUULYO

1. Emisabe ni bihi kwehi?
2. Emisabe yikakolha lhumimbi lhwahi omo ngebe syethu?
3. Thukatholera erisaba ngendo singahi?
4. Erisaba likatholera wahi?
5. Ghusome n'erikania kubyo Yohana 9:31.
6. Omubihya angasabira bindu byahi?
7. Omwikiiriirya ni wahi?
8. Nindi utholere erihika oko Nyamuhanga omo misabe?
9. Omubiihya anganalhamiibwa erilhaba omwisaba?
10. Thokatholera ithwasaba erilhaba omu wahi?
11. Yesu abiribya kyindu kyahi busana nethu?
12. Thonda erisaba omo mulimu n'omo kwenene?
13. Kinathokekene e bandu erilenga oko omukama erilhaba omo misabe yethu?
14. Erisaba ly'omukama ni ryahi?
15. Busana naki thuthatholera erikolesya erisaba eri?
16. Thonda ebindu ebithukatholera erisaba.
17. Ni bandi bahi abo thutholere erisaba?
18. Ni bindu byahi ebyo Nyamuhanga akathukunga omughulhu thukasaba?

19. Abiikiiriirya bangasabira omo maka wabu omo kitswa ky'erihindana n'abandi?

20. Thukatholera ithwasaba thuthi kwehi?

EKY'ERYIGHA 10: ERYIMBA

Ekyisomo ky'ekyikristo ni kyisomo ky'eryiimba. Eryiimba nimikolere mi-ghuma y'omwiramya, linasakire omo ndaghano nyihya-nyihya. Omwiky'eryigha ekyi ekyikuuhi, thuyasamalira kutsibu oko kyihandi ekyi ekyikulhu ekyihambire okwiramya.

Erimbere, thukanza eriminyerera emilhondo mingyi eyikakanaya oko ky'erigha ekyi:

1. *“Neryo babere babiryiimba olhwimbo, mubaghenda oko kyithwa kye Mizaituni”* (Matayo 26:30).

2. *“Niikwa omo kathi kanene, Paulo na Sila babya bakasaba n'eryiimba esyonyimbo sy'eripipia Nyamuhanga, n'abandu b'omulikiyi mubahulikiriirabo”* (Emibiri 16:25).

3. *“Kandi Kristo athokesaye ebihanda ibyapipa Nyamuhanga busana n'eryangiriira liwe ngoko kysisakirwe kyithi, neryo busana n'ekyo, Nasyakupipa omo kathi-kathi ke'ebihanda, nasyiimba ebikapipa erina lwaghu.”* (Baroma 15:9).

4. *“Neryo ngendikukolhakiyi kwehi Ngendisaba omo kyirimu, ngesaba omo bulengekania bwaghe nibya. Ngendisaba omo kyirimu kyaghe, kandi ngendisaba omo bulengekania bwaghe nibya.”* (I Korinto 4:15).

5. *“Mukanaye omo biinywa by'ewasiingya neby'esyonyimbo, n'emirenge y'eripipa Nyamuhang, kandi mwimbe n'eriyira omulenge owuwene busana n'omukama omo mithima yenyu.”* (Efeso 5:19).

6. *“Ebiinywa bya Kristo, omo bubuya bwabyo boshi byikale omo mithima yenyu mukangiriranaye n'erihana buli mundu mulikyabo omo munge ghosi. Mwimbe esyonyimbo, esyonyimbo sy'eripipa, n'esyonyinyimbo sy'eriramya, mwimbire Nyamuhanga n'emithima yenyu y'ewasiingya.”* (Kolosai 3:16).

7. *“Athi, nasyakangania erina lyawe oko baghalha bethu, nasyakwimbira n'erikupipa embere sy'endeko yosi.”* (Hebrania 2:12).

8. *“Hali mundu omukathi-katji kenyu akaghalhawa kwehi? Asabe. Hali oyukatsema kwehi? Imbe n'eripipa”* (Yakobo 5:13).

9. *“Nabo mubimba olhwimbo luhya-luhya bathi...”* (Eribisulirwa 5:9).

10. *“Nabo mubahangana embere w'ekyithumbi ky'bwami...”* (Eribisulirwa 14:3).

11. *“Babya bakimba olhwimbo lhw'ekyana ky'embuuli bathi...”* (Eribisulirwa 15:3).

Lithya omo ndondekania y'esyambapura sy'omo ndaghano nyihya-nyihya, eyi y'emilhondo misa eyihambire oko mwatsi w'eryimba. Neryo kyikabya nga-

kyilhangirikire ndeke omukama ngakasonda kyi oko lhuhandi lhw'eryimba. Ekyangongerwaho kutse erilhusyako ikyikendibya esikyikwamene n'ekyiinywa kyiwe.

Oko bandu b'ekyisomo abangyi, eryimba likalengekanibawa omo byuma. Nokweryo, ebithuunga bingyi by'emo bisomo bikalengekaniraya omw'im-bisya ebyuma erikwama emirenge. Niikwa abosi banikiriirye bathi endagha-no nyihya-nyihya yikakangiriraya yithi ithwathunga esyonyimbo omw'iramyalyethu, sibabosi abakaliigha bathi eryimbisya ebyuma litholere eryabyamo. Niikwa Biblia yikabuugha yithi kyi? Yikakangiriraya eryimba lisa kutse yithi eryimbisya ebyuma nalyo niry'eribya omw'iramyalye? Kyinathikekene eriramyalishimuli byuma? Kyinathokekene eribyamo nabyo? Kuste kyinathokekene eribya n'ebyosi? Thukatha-lebya.

Thukelhangira eky'erimbere thuthi hali emisindo ebiri y'esyonyimbo isyasibwe n'abandu: emirenge n'erikolesya ebyuma. Erikolesya emirenge likahulhukibawa n'emikyi y'omo mimero y'abandu. Yikahumulha. Yikalhwa omo buhangiki bwa Nyamuhanga. Busana n'ekyi, kyabiribuwa ngoko esyonyimbo esyowene kwilhaba omo kyihugho ekyosi, sy'esyanyimbo esikalhwa omw'ithulhungania emirenge y'abandu. Emirenge y'ebyuma sikuyiri yitya. Kusangwa yikakakawa. Ebyuma bikakolawa n'abandu. Byuuhuuhiirire, bithundubere, simuli muliimu, kandi sibiwithe bulengekania. Enzumwa nguma nyisa eyikaleka ibyalhwamo emirenge yiri yithi omundu akahumbanga kubyo, inyathuulha-thuulha oko mirikiyi yabyo, kutse eribuhiramo omuka, erikwamana nga ni kyuma kya musiiendo wahi. Nyamuhanga siyo wakyikolha athya, niikwa ni tsopa-tsopania lya mundu. Kyikimaniira kyindi kyindu buyira. Lithya nyamuhanga angatsemera kyahi omw'ebi? Omuasakangyi mu Hebrania akabuugha athi, "*neryo buasana na yesu, thuhe eripipa lyethu ng'obuhere oku nyamuhanga. Kandi emireenge yethu yipipe erina liwe.*" (Hebrania 13:15).

Emighulhu eminene abanya bisomo abasiibwe kutsibu sibaliriigha ambu omw'iramyalye mutholere imwabya eryimbiisya ebyuma, niikwa bathi eryimba likatholera iryabya ngoko Biblia yikakangiriraya. Thukathalebya ebiinywa byabu ahiikwa:

1. John Wesley: "singawithe erighania eryimbisya obyuma, omw'ihindana lyethu, byamabya isibwedyuwibwa kutse erilhangirwa." Clarke's Commentary, Vol. IV, p. 686.

2. John Calvin: "erikolesya ebyuma omwitsangira eripipa Nyamuhanga si-lyangatholera kwilhaba eryokya obukwa, eryakirirya syatala, erisuba-subania ebyutsuutsuu by'ebihano. Nokwero, aba Baptist bukyiru-kyiru babiri liigha ekyi, ng'ebindi binene erilhwa oko Bayuda". John Calvin's Commentary,

Thirty-third Psalm.

3. Martin Luther: mwahulhamo “ekyuma akaminyikalho ka Baali”. McClintock and Strong’s Encyclopedia, Music Vol. VI, p. 762.

4. Adam Clarke: “Eryimba ngesayasi ngalyanzire n’eririsima: Niikwa ebyuma by’eryimbisya omwa nyumba ya Nyamuhanga singalyanzire kandi ngalikwa obusu. Ekyi ni kolesya nabi eryimba: Nahabwekyo ngakanganaya eripona lyaghe busana neritsandya eriramyanya Nyamuhanga oyo waletha obukristo”. Clarke’s Commentary, Vol. IV, p. 686.

Ni bakangirirya bangyi b’eBiblia ababirikania ng’abahighulhu aba erithendighenda-ghendania n’omwatsi w’erikolesya ebyuma. Niikwa ekyindu ekyi kyatsuuka kyithi? Omo kanisa y’ekikatoliki, kandi ngoko amadini manene alhwire omo kikatoliki neryo mangyi kugho malhwayo n’eryimbisya ebyuma omomaramiryo.

Ebisomo ebinene bikalwirira erikolesya ebyuma ibanemukangania binu:

1. Bakabuugha bathi Daudi mwakolesyabyo. Ekyi kyanganabya kya kwenene niikwa Daudi abyaho omo kyihano kyindi n’ethu thuli omo kyihano kyindi. Sithwangakolha ebyo Daudi akolha, thuthi kusangwa mwakolha athya. Kyamabya iko biri bithya thwangaghendire eyerusalemu oboli mwaka thukayahonga ebisoro by’eryokererya, n’ebindi ng’ebyo. Wibuke ghuthi abo abakasuba enyuuma oko mughulhu wa Dauir bakakolha bathya busana n’esyoinyimbo sy’ebyuma nyisa, niikwambino nebindi bindu bike, niikwa isibanzire ebyosi ebyo Daudi aby’awithe. Niikwa usome Yohana 1:17; 2 Korinto 3; Hebrania 10:9, n’ebindi.

2. Bakabuugha bathi sikyikanaya okw’ithethungabyo. Niikwa sikyiribuugha okwithendithunga bindu bingyi omw’iramyanya. Niikwa kyikakanaya oko byangathungwa, kandi kyikakanaya kyithi ithwimba. (Efeso 5:19). Ekyo kyikalhusayamo ebindi.

3. Bakabuugha bathi sihali kithere omwikolha bathya. Hanganabya isihali kyithere, omwithunga ebyuma eby’eryimbisya oko ka, omo herukania, omwitsangya-tsangya abandu, niikwa omwiramyanya, ni kyindu kya ngabane. Kyangabya kyibi erithomekera okwiramyanya omukama niibya isyathalghahir’akyo. (Eribisulirwa 22:18-19).

4. Bakabuugha bathi kyikawathikaya omw’iramyanya. Neryo, ni busana nakyi omukama mwathalghahir’akyo? Niikwa ngabahana nyithi sikyindu ky’eriwathikya lisa niikwa omo kwenene kyikabya kyindu ky’eriramyamo kyamakolesiibwa. Ekyi kyikabya isithuthaghenda-ghendania n’amasako.

5. Bakabuugha bathi omo lhubulha mukendisyabya eryimba. Amasako syalikangiriraya athi hakesyabya eryimbisya ebyuma omo Lhubulha. N’mo by-

angangabya ibikendisyaby'ayo, ekyi sikirithulhaghira eribikolesya. Elhubulha yikendisyabya bindu bingyi ebyothuthethwangathunga omughulhu ono.

6. Bakabuugha bathi banzirebyo. Inga, nganzire ehiiggati n'eyisande, niikwa ekyi kyikamiinyisaya ambu inabikolesya omwiramya? Ekyibuulyo, sikyiri kyithi, eyihi, thunanzirekyo, niikwa omukama ananzir'ebyo?

Neryo thwamahindana oko kyiro ky'omukama omwiramya, thuli beripipa omukama erilhaba omw'imba. Ekyi ni ky'erikolha omo muliimu n'okwenene. Nokweryo, thukatholera ithwimba ithune n'obulengekania kandi omo kwenene okwosi. Thukatholera ithwimba erikwamana n'amasako, n'ekyi kyikamiinyisaya eripipa erilhaba omo mirenge yethu. Sibyo ebi bisa, niikwa esyonyimba nyisa-nyisa sikatholera esyabya isikakanaya amasako n'omulimu inyoswiremo.

Biblia ikakangiriraya esyonyimbo esy'abanene. Ekyi nibuugha ambu ithwabosi thuliberihira emirenge yethu yo haghuma omwimba esyonyinyimbo sy'eripipa n'esyomuliimu. Erilhaba omo syonyimbo esi thukabya ithukapipa, erikangirirania, kandi n'erihabulha n'erithasyaletha omuuhwa om'obuli muyima, athoke eribya wa muyiketherwa embere sy'omukama. Kikatsemesaya eryimba esyonyimbo esi, isisirimo erisulhu-suuthiibwa n'emirenge mibi-mibi ey'ebyuma, niikwa neriyibombeka, obuholho, na n'eriheherya emirenge yethu erisumbwa omwipipa ery'aobuli mughulhu embere sya Nyamuhanga ow'elhubulha. Ekyangatholera ni kyahi? Ekyangabya kya muliimu ni kyahi? Ekyo kyo Nyamuhanga akasonda.

EBIBUULYO

1. Engangirirya y'ekikristo ni yahi?
2. Soma emilhondo eyindi omo ndaghani nyihya-nyihya eyikasomesaya eryimba.
3. Emilhondo eyi yikanakangiriraya eryimbisya ebyuma?
4. Thonda emisiindo ebiri ey'esyanyimbo.
5. Erimbisya emirenge ni kyi?
6. Thondogholha eryimbisya ebyuma nga nikiyi?
7. Nyamuhanga akasonda ithwamupipa thuthi?
8. Hereraya amena wabakangirirya ab'ebisomo abatheghenda-ghendanaya n'eryimbisya ebyuma omwiramya.
9. Eryimbisya ebyuma lya tsuukira hayi?
10. Abandu abakakolesya ebyuma omwimba bakaheraya nzumwa syahi esikaleka ibakolesya ebyuma omwiramya?
11. Busana nakiyi sithasuba enyuuma omo mughulhu wa Daudi o'weri-

kolesya ebyuma omw'iramyā?

12. Ekyikasubaya enyuuma erikolesya ebyuma omw'iramyā ni kyahi?

13. Thanganahulikirira esyonyimbo syebyuma omo maka?

14. Ekyi kyikaleka ebyuma ibyatholera omw'iramyā?

15. Soma Eribisulirwa 22:18-19.

16. Elhubulha yinemwendisyabya erikolesya ebyuma omw'imba?

17. Omukama angalighira ekyindu ekyiryaalethawa omwiramyā ambu kusangwa kyanzibirwe?

18. Ni musindo wahi w'eeryimba ow'omukama akasonda? 19. Eryimba lya haghuma likamiinyisaya kyi?

20. Hereraya esyanzumwa esikaleka habya ery'imba?

EKY'ERYIGHA 11: EERIRYA OKO MEZA Y'OMUKAMA

Oghundi musindo ow'eriramiryamo ly'erirya oko kyihulho ky'omukama. Kristo anaby'asi ngoko omundu akibirirawa. N'okweryo, mwanza erisiigha enyuuma y'ekyindu ekyikendisyabya kyikamwibuukya ery'ibuka. Ekyibuu-kyo ekyi, ky'asibwe mo meza y'omukama.

Thuthethwalholhya embere, thukathalebya ngoko yatsuuka. Thusome Matayo 26:26-28; “*Neryo omughulhu babya bakalya, Yesu mwimya obundu, neryo embere abiritsumulh'abo, mwatsutsang'abo, mwahabwo abigha athi, mwimaye mulye, oyu nimubiri waghe.*” Neryo mwimya olhuthehi, mwaha ewasiingya neryo mwah'alhobo athi Mupuulaye kulho inywebosi kusanga oyu ni musasi waghe, omusasi w'endaghane owakuuthawa busana n'abangyi, busana n'eribuyira ebibi”. Wamalhangira ngoko kyabya kyilhobire. Kristo mwakangya ngoko obundu bukiimanira omubiri wiwe nokw'eryo niwerikolesya omw'ibuka omubiri wiwe, neryo mwabuugha athi olhuthehi lh'ebyighuma by'ebinyu, bik'imanira omusasi wiwe, niby'erikolesiibwa omwibuka omusasi wiwe. Omo bindi biinywa, Kristo mwathanza abigha biwe eryibirirwa ekyihongwa ekyahongawa busana nabo, nokweryo erighabana omuggati n'olhuthehi ok'obuli kyiro ky'omukama omw'ibuka omubiri wiwe n'omusasi wiwe, neryo ikyikendii-kalha omo malengekania wabu.

Thwamasuba omo I Korinto 11:20-29, Paulo akasakira abikiiriirya be Korinto “Neryo omughulhu mukahiindana haghuma simulihindana busana n'erirya oko meza y'omukama kusangwa omughulhu mukalya, obuli mundu akatsuuka erirya ebyalya biwe; omughuma akawira, n'oghundi akakunda. Ko simuwithe amanyuumba wenyu aho mukalira n'eripuulya kwehi? Kutse mukapona ekanisa ya Nyamuhanga, nerihemulha abathawitheki kwehi? Nyibabwire kyi kwehi? Nasyabapipa kwehi? Eyih, sindiba pipa omo mwatsi

oyu. Kusangwa ebyo Mukama anyikangiriraya byanebyo nganemubakan-girirya nyithi, Omukama Yesu omughulhu ahootherawa mwimya obundu; neryo abere abiriha ewasiingya oko Nyamuhanga, mwathwabo, mwabuugha athi, obu ni mubiri waghe owali busana nenyu. Mukole muthya busana n'erinyibuka. Nenyuuma w'erirya mwimya olhuthehi lhw'athya, athi, olhuthehi olhu ni ndaghane nyihya-nyihya omo musasi waghe; mukole muthya emighulhu mukapuulhaya kulho busana n'erinyibuka. Kusangwa emighulhu yosi mukalya oko bundu obu n'eripuulya oko lhuthehi, mukakanganaya olhuholho lhw'omukama, erihika aho asyasira. Neryo omundu oyukalya oko bundu obwo bw'omukama kutse eripuulya oko lhuthehi lhw'omukama omo musindo owathatholere, iniabirihalya oko mubiri n'omusasi w'omukama. Niikwa omundu ayitswere, neryo alye okobundu obo n'eripuulya oko lhuthehi. Kusangwa omundu amathendiminya ndeke omwatsi w'omubiri w'omukama omughulhu akalya n'eripuulya oko meza eyo, akayirethera olhubanza". Neryo okwitsuka Paulo mwatsweba abikiiriirya b'e Korinto omusiindo owobabay bakaliramo oko meza y'omukama. Omo kitswa kw'erikolhagho ngoko omukama abya inyabiribalhaghira, mubabya ibabiribindulhagho mo bugheni bw'eryirya amabunda inyoghutha n'erikunda. Ekyi sikyabya kyitholere nahake. Niikwa, akaghenda akabakangya ekilhubirirwa kyabyo n'omusindo ow'erikoleramo omubalha oyo. Paulo akathasyababwira ngoko omwatsi oyu oghosi alhusayagho oko mukama kandi akathasyakamathaya ndeke enzumwa eyi, ngoko biri ahikwa:

1. Omukama atsuka ekyihulho ekyi omo kyiho ahootherawa.
2. Mwabathulira athi obundu [omuggati] bwabya bw'eribibukya omubiri wiwe owathwibawa busana nabo.
3. Kwanabya ahambire athya olhuthehi n'eribakangya ngoko bakesyabya bakakolha bakibuka omusasi wiwe.
4. Obuli mugulhu hakabya erirya okwa kihulhu eki kikanganaya olhuholho lhw'omukama erihika aho asyasira.
5. Abo abangalya oko meza isibatholere bakahalaya okwa mubiri nomusasi wa Kristo.
6. Obuli mundu niweriyitswera imwalya oko meza.
7. Abo abangalya isibatholere bakabya ibakalya n'eriinywa olubanza.

Neryo esi syesyanzumwa esyakathonda neryo thukakolha ndeke thwamighasyo n'eriyithya.

Thukalholya embere n'ekyeryigha kyethu, muli bindu bingyi ebyothukatholera eriminyerera:

1. Omukama syalikangiriraya athi ithwakolesya lhuthehi lhugumerera.

Oghundi mughulhu ukasangana ebithunga-bithunga by, abandu bakaminya bathi olhuthehi.

lhughumerera lhwangakolesiibwa abandu abosi oko meza y'omukama, ekyithuunga ekyosi iwasanga ibanywiira oko lhuthehi lhughuma. Inga, omukama mwathabya inyakanaya kutsibu oko lhuthehi niikwa ebyabya omo lhuthehi. Lithya n'omo kyangabya omo lhuthehi lhughuma kutse nyingyi, sikyiriletha ngabane liriryo wanabairiyitsungira omwibuka omusasi wa Kristo. Omughulhu mughuma omundu mwalhambayira ekyithunga ekyabya kyikirirya omwikolesya olhuthehi lhughuma, neryo lhwabere lhukamulhabako neryo mwanywa ebinyu ebyosi ebyamo. Neryo bamayisanga inyabirinywa ebyosi, neryo abandi mubasyanywa byahi kwehi? Mwabibukya ngoko omukama abuugha. "munywe ebyosi" ekyi kikakanganaya ngoko abandu bangahabisiibwa oko kyindu ekyolho-kyolho ng'olhuthehi. Nomwakyangabya isiky'omumasoko erikolesya lhuthehi lhughuma, kyikabya busana n'eby'buyingo, n'esindi nsumwa, kyangabere kyibuya obuli mundu erikolesya lhuthehi lhwiwe.

2. Bithe okwibuka omubiri n'emusasi wa Kristo omwirya oko meza, ni kyibukyo ngoko hane abandu abikiiriraya omw'isubulha lya Kristo. Ekyi kokyathabya kyithya, neryo sibangabere ebikayitsungira omo mwatsi w'emeza y'omukama oyu.

3. Eribya oko eza y'omukama nibuthuku obw'omundu akathunga omughisa eriyibuulya ebikabya ibyabirilhaba omo ngebe yiwe omo yenga eyilhabire, kutse omo syayenga nene amabya isyalhwe muyiketherwa omwasa liwe, neryo athya inyayikubungulha erilhangira engebe yiwe iy'obwikirirya ngoko yiri. Kandi amayisanga athi anemulinda engebe yiwe omobuyiketherwa, neryo ikyabya inyaghenda embere n'eririlya oko meza y'omukama. Nomo kyine kyithya, amasangana omo ngebe yiwe imune ebithuwene neryo inyatsuuka eriyisubamo n'erisuba-subania ebyosi ebikayitsutsawa neryo inimo inyalya oko meza.

4. Omundu amathalhuka eriyitswera neryo akaghenda embere n'erighenda oko meza isyathaleghana emibere yiwe eyithemwikiriraya erirya, neryo omo kyitswa ky'erirya n'epuulya busana nerilama, inyamalya n'eripulya olhubanza. Ni kwenene sihali oyutholere kusangwa ithwabosi thukakolha ebibi. Nomo kyine kyithya, omukama mwaminya ngoko thuthathunganene neryo thukakolha kustibu erikolha ekyitholere, nokweryo omw'ekyi thukasabawa eriyitsungiramo. Niikwa omundu mughuma, omo buthaleghana, kutse akakwamirira ebibi, neryo oyo akabya isyayitheka-thehire erirya oko meza. Aho syendibya inyamahera kusangwa syathalya omo kitswa ky'eriyitheba

n'abandi bakalengekania ambu anatholere. Niikwa omukama anasi, neryo omundu oyu akatholera erisuba-subania n'erilhungulha eby'omo ngebe yiwe imwathoka erirya oko meza eyi kinya-mulimu n'erikwamana n'amasako.

5. Sithutholere erirya oko meza ithubene, neryo thukakakirya abandi bikirirya abosi erirya neririghira abake neryo bakabya ababakendirya. Amasako akabuugha athi thuli beriyitswera.

Okwihiinda ekyipindi kyino, thukasoma omo Emibiri 20:7 aho abiikiiriirya ab'erimbere bahindana oko kyiro ekyikatsuuka eyenga erirya oko bundu. Nokweryo, nethu thuli berikolha thuthya. Niikwa kyiro kyahi eky'erimbere? Obuli kyiro ekyikatsuuka eyenga. Nindi wakuhererya kutse ingye obuthokyi erihiraho kyiro kyirebe eribya ekyikatsuuka eyenga eribya kyiro ky'omukama, ekyothukatholera erirya oko meza? Sihali namughuma. Nokweyo muyire thulekekyo ngoko omukama anasiigha kyo, abandu biwe ibanemuhindana obuli kyiro kyikatsuuka eyenga eryasa ramya hayiima n'erirya ekyihulho.

EBIBUULYO

1. Oyuwahiraho emeza y'omukama nindi?
2. Soma Matayo 26:26-28.
3. Busana nakiy thukalya oko mugati?
4. Ebiinyuu biikiimanira kyi.”
5. Abigha babya berirya ngendo singahi?
6. Soma I Korinto 11:20-29.
7. Abakorinto babya bakakolha kyi oko meza y'omukama?
8. Paulo mwakolha oko kyiritho ekyi kw'athi?
9. Paulo alhusaya omwatsi wo hayi owahambire oko meza y'omukama?
10. Thonda olhuholho lhw'omukama lhwanganibirwe erihika aho asya-sira erilhabya omwirya oko meza.
11. Hangabere kyi kubalya isibatholere?
12. Amasako akanakangirirya erikolesya olhuthelhi lhughuma?
13. Ekyikulhu kyiri oko lhuthelhi kutse oko biri omo lhuthelhi?
14. Erirya oko meza liwithe buhugho bwahi n'erisubulha lya Yesu?
15. Thathonda ngoko erirya oko meza kyanganyabya mughisa oko ob'obuli mwikiriirya oyukalya kuyo.
16. Omukama akalengekanaya omundu eribya isyalko kahinira athe asalya oko meza?
17. Omundu anatholere eriya oko meza kandi inyanemubiihya omw'okol-erera?
18. Thwangabwira omundu wosi-wosi thuthi syatholere erirya oko meza?

19. Ni kyiro kyahi ekyo abikirirya bakatholera erihindan'amo oko meza?

20. Omukama anathubwire kyiro kyahi omo yenga eky'erihindanir'amo busana n'erirya oko meza?

EKY'ERYIGHA 12: ERIHIITHYA (ERIWATHIKYA)

Thukabughirira, thwamahika oko ky'erikolha ekyiri omo ndaghano nyihya-nyihya ekyihambire okw'iramyanya kyekihambire okw'ihiiithya. Biblia yamabya iyikakangiriraya oko bindu bingyi, ekyighuma kyakubyo ky'ekyi. Niikwa abandu abanene sibasi oko ky'eryigha ekyi. Nokweryo, thukanza erirebya amasako ngakakyiibuughako athikiyi. Thuketsuuka eriminyerera eby'eryigha birebe ebikulhu-bikulhu omo masako.

Thwamabendukira I Korinto 16:1,2: *“Neryo busana n'omwatsi w'eriwathikya balikyethu abandu ba Nyamuhanga. Mukole ngoko ngathegeka esya kanisa sya Galatia. Ok'obuli kyiro ky'eyenga, obuli mundu abike ekyihandi ky'enduundi akabana, butsira erilhabya ekyibo kyiro nasyahiika.”* Thuthe thwaghenda embere, thusamalire ndeko emilhondo eyi imothwaminyanya enzumwa eyakabuugha hano.

1. Erihiithya eri lyabya likabyaho oko kyiro ky'eritsuuka eyenga. Busana nakyi? Eribya ikyabya kyiro ekyo abikiiriirya bakahiindana bakasa ramya neryo ekyi yabya ndambi eyithekirweho busana n'eryasa hira omwakibo. Niikwa neryo ebindi biro ihakabya kyi? Sihali ekyikabuughibawa busana n'ebindi biro. Niikwa busana n'erilhaghira eri neryo mukyalhaghira eribya oko kyiro ky'eritsuuka eyenga. Omughulho ono ebisomo bingyi biwithe erisongya-songya lya misindo mingyi kutse obuli nambi bakahindana, nomokyangabya ambu kyamayisunza erihindana obuli kyiro. Nomo bine bithya, erikwamana n'eky'erikolha ekyi, neryo kyikatholera ikyasa oko ndambi yisunzire kyamabya ikyikendikwama-kwamaniibwa erikwana n'amasako. Busana nekyi, amakanisa wa Kristo akahindana obuli kyiro ky'eritsuuka eyenga, oyu w'omughulhu obuli mwikiiriirya akatholera erihiiithya.

2. Abikiiriirya abosi bakalengekaniribawa omw'ihiiithya. Ni kwenene ekyi kyangathokekana bamasangwa ibabirithokesibwa omo yenga erilhabire. Omukama syalilengekaniraya abandu biwe erihiiithya bamabya isibathabana kandu kosi. Niikwa, syali balengekanay'amo erihiiithya bamabya isibathabana ndundi. Nomo bine bithya akalengekanaya athi bakendihiithya bamabya ibanganathoka erikolha bathya, kandi erighana erikolha bathya, ni kyibi.

3. Babya iniberitheka omo bighoma erikwamana n'ebyo babya ibabirithunga. Omo mughulhu oyo omo mwabya erihitya esyonyinyi, ebisoro bamasangwa ibanabya nabyo. Kyangamiinyiisya esyambuulho nibya. Omughulhu ono thukahiithaya esyombuulho kusangwa bangyi bakabindulha ebyo

bawithe mo mbulho kutse ibakolerera esyambuulho obuli yenga. Niikwa ekyi kyikakwamna n'omwanya ogho mukabya imulimo, abandu, kutse omughulhu, erihiiithya lianganabya mbulho kutse ebindu ebindi.

4. Babaya b'erihiiithya erikwamana n'erithunga lyabu. Nibuugha ambu babaya b'erihiiithya erikwana n'eryingiirya lyabu. Niikwa bingahi byoko by'obabiirunda? Ekyo kyangabya okwibo, namunabwire kobine bithya. Endagha-no nyihya-nyihya siyirikangiriirara erihiiithya kighuma ky'okwikuumi. Niikwa, isithwathikathikira erihiiithya ebirengire oko kighuma ky'omwikuumi ngoko ithwe thuli omo kyihano ekyibuya kwilhaba ekyo abayuda babyamo niikwa muba-hiiithya kyighuma ky'omwikuumi. Niikwa thwamabya ithuwithe ekihano ekyirengire ekyo, hali erilhawa libuya n'amaha mibuya, busana nakyi thuthahiiithya binene kwehi? Nabiriminya hano Asia nyithi obuli mundu ananzire erihiiithya omughulhu omunene bakahiiithaya bike-bike. Omo mughulhu eyindi bikabya eby'aneby'omundu angina hiithya, niikwa abandu ibanganahiiithiirye binene oko byo bakahiiithaya. Kandi munalhangira ngoko abandu be Asia bawithe esyambuulho esy'erithwalha omwiyasamalira ebisosano, ethaba, n'ebindi binene. Munamiinya ngoko abandu banu nib'ekyihugho, niikwa bamabya ibawithe esy'erithwalha omo bindu ebi, neryo iwe esyaghu ghulasikolesaya bihi? Naghu wanganabya ukakolesaya esyaghu omo bindu ebi kutse ebiri ng'ebi. Inga, nahano thwanganakolha bingyi kwilhaba ebithukakolha munabwire. Omukama akabuugha athi thukatholera ithwawathikya ngoko thwathungire. Ghunasi ebyowathungire kandi ghunasi ebyoghukatholera iwahiiithya. Omughulhu omunene, abaghuma okwinywe mwanganathoka erihiiithya kake akalhabire oko mbuulho sy'esyambapura esyo mwangalengekania. Ni kwenene sinangababwira ebyo mutholere erihiiithya, kutse simwanganyibwira niikwa omukama oyo anasi ebimutholere erihiiithya, nokweryo endambi yeno ey'erihiiithiry'amo binene. Simulikiriraya ekyi?

5. Babaya b'erighenda embere n'eriya hiithya imohathabya erisongya-songya omughulhu Paulo ahika. Omo binywa ebindi, kubakwama erilhaghira lyiwe neryo omwatsi aghosi angabya inyabiribya ndeke neryo ibathoka eriwathikya abali bwagha. N'omughulhu ono kobine bithya. Thwamabya ithukendihiiithya ngoko omukama asondire, neryo ithukendithunga esyambuulho esy'erikolesya omo mubiiri w'omukama. Lithya omo kyihugho ky'ebisomo amakanisa mangyi syalikwama erikangiriirya eri nokweryo bakasabiiriiraya esyambuulho. Omo kitswa ky'erihiiithya ibobene-bene, bakaghenda omo kyihugho erisabiiriirya. Abandi bakaghulhaya obutabu. Abandi kwibo bawithe amaduka w'obuli kyindu, abandi ibakolha emyanya y'eritsangir'amo. Niikwa omukama abirilhaghira abandu biwe eriwathiikya omo musiindo bangatho-

iyuwene-wene athi “ erihiiithya likaletha butseme kwilhaba erihebwa” (Emiibii-ri 20:35). Busana nakyi? Kusangwa abangyi okwithwe bawithe omururu, sibalilhwika, ni bakuku, nokweryo thukiba Nyamuhanga y’ebyiwe. Nyamuhanga athuwathikaye thubuke Ithwanatsuuka erimusuubuulirya oko byiwe thuwithe omo kwenene ebikabya inina byiwe. Sithwangabya abikiiriirya abo thukatholera eribya, erikolya aho thwasighira erihiiithya erikwamana n’amasako.

EBIBUULYO

1. Biblia yikanakangiriraya okwihitya?
2. Abandu abanene bakanahithaya ngoko batholere ibahitya?
3. Tsuka erisoma I Korinto 16:1,2.
4. Thulhagho ekyiro abikirirya bakatholera erihind’amo n’eribika omo bighona.
5. Ebindi biro ni kuthi?
6. Esindi ngangiriirya sikahindana ngendo singahi bakasongya-songya eby’eriwathiky’amo?
7. Abikiirirya abosi bakalengekaniribaw’amo erihiiithya?
8. Niikwa abandi bamabya isibangathoka eriwathikya, ibyabya bithi?
9. Omukama akalengekanaya athi abandu biwe ibawathikya bamabya isibathabana omo yenga eyilhabire?
10. Ni byahi kwesi ebyo bakatholera erihiiithya?
11. Akanalengekanaya athi bakendiwathikya bamabya ibabiribana omo yenga eyilhabire?
12. Bakatholera ibahiiithya bingahi?
13. Endaghano nyihya-nyihya yikanakangiriraya eriletha ekyighuma ky’omwikuumi?
14. Busana nakyi thukatholera ithwahiithya ebilhabire oko kyighuma ky’omwikuumi?
15. Abandu bakabya ibawithe mbulho sinene oko bindu abyobakabya ibali bwagha?
16. Busana nakyi sithulithunga binene eby’erikolha omubiiri w’omukama?
17. Thonda busana nakyi abikirirya bakatholera ibawathikya?
18. Ebisomo ebindi bikabana bithi esyombuulho esy’erikolhamo eriyitsutsa lyabyo?
19. Ekyi ky’omukama asondire abandu biwe ibakolha?
20. Soma II Korinto 9:6,7.
21. Thonda omusingyi w’eribiba n’erihulhulha.
22. Busana nakyi abangyi okwithwe sibalihulhulha bingyi?

23. Kyikamiinyiisaya kyi eri wathikya ngoko thwabirithoka?

24. Omukama akasonda ithwahiithya omwikakwa kutse busana n'eri yitsutsa?

Thathonda kubyo.

25. Omukama akanza omuwathikya wa musiiendo wahi?

26. Oyuwabuugha athi, “ni mughisa erihithya kwilhaba erihebwa?”.

27. Thathonda oko bikiririya abanene oko mwatsi w'erihiithya.

EKY'ERYIGHA 13: ERITHENDIHIINDANA OMWIRAMYA

Ekyighuma oko bikitha bulighe eky'omwikirirya angakolha ly'erithalhuka erihindana n'abikirirya abandi. Omundu angathoka athi eribya wa muthambo oko Nyamuhanga amabya isyamusiikiirye kukyikayisuunzawa erihindana n'abandi bikirirya omw'iramyamya? Enzumwa yiri yithi, syangathoka eribya muyiketherwa ane omo mibere eyi.

Bangyi oko bomo bisomo bakahindana ngendo nguma omo mwaka, omo Mabuthwa wa Yesu hayiima nomo Pasika, sihali nakyighuma okwebi ekyikakangiribawa omo kyinywa kya Nyamuhanga. Niikwa ni bangyi abayitheba bakalengekania bathi ekyi kiyitsutsirwe eritsemesya omukama. Bakalengekanaya bathi omukama nindi? Niikwa eribya hakuuhi n'eka, bangyi boko bikirirya bakaghenda omo kanisa ngendo nyike. Bakahereraya eriyihambulha lino na liryamya. Y'emibiiri yabo eyikabakakiraya erithendighenda omo kanisa kutse lhw'olhughendo eribya lhuli? Omulyambo ghoyu, n'olhya, hayiima n'eyindi miryambo. Niikwa ekyibuulyo kyiri kyithi, omukama anemwendisyaliigha eriyihambuulya eri? Hanu hali abandu abayahulha mo bikiririya niikwa isibalihiindana omw'iramyamya. Oko lhuhandi olhundi, banga ghenda embere ibanemukolha ebyobanzire erikolha, bangalholhya embere ibanemukolha emibiiri yabo isibaleghene obuli bw'olhughendo.

Abaghuma okwaboabakathalhuka erihindana, omughulhu omenene bakabuugha bathi “niikwa ingye ngaramiraya eka.” Ekyi kyangabere kyibuya kukyabya omukama ikwakasoda athya. Niikwa abirilhaghira athi abandu biwe ibahiindana omo kyiro ekyikatsuuka eyenga. Imwakolha bathya, sibalibya ibakasaba lisa, niikwa eryigha, eryimba, erirya oko meza, n'erihiithya oko byo balyabana. Sibomwabo akalengesaya eriramirya omo maka, ebi-bakasonga-songaya bakabiheraya ndi? Kandi emeza y'omukama? Eyihini, nganasi abangyi okwabo sibalilhaba okwisaba lisa omwiramya lyabo. Bamahika eghosi eyo, niikwa bayisunzire erikangiriribwa ngoko yiri bingyi ebihambire okwiramya Nyamuhanga isi saba lisa.

Ni kwenene hali mighulhu minene omughulhu abiikiiriirya banganaka-

kiribwa erihindana ng'omughulhu w'eribya ibalwere n'eyindi mibere eyang-abakakirya erithendihindana omw'iramyā. Omo mughulhu ngoyu, omundu syatholere eriyithonganira kusangwa alyusa ihane enzumwa. Erithomeka oko, omukama akikiriraya eryusa ly'omundu olyulyusa, niikwa syangikirirya eriyihambulya.

Niikwa thuthasamalira ekyiinywa ky'omukama ikyo ngakyikabuugha ky-ithi kyi. Omusakangi Muherania akabuugha athi, "*Thuhambe ndeke amaha wethu aghothukwamire bustira erithika-thika kusangwa oyuwathuulha omwatsi oyu syaleghulha. Thughaniraye ngoko thwangiibukania oko lhwanzo n'emibiiri yuwene. Sithuleke erihindana lyethu haghuma, ng'emiiiiri ya bandi bandu niikwa thusiikanaye kandi thuyitsinge omwebyo, omughulhu thukalhangira ekyiro ky'omukama kyikahiika hakuhi, thwamasim-birira erikwama ebibi omo pono, ithwabiriminya ndeke omwatsi w'okwenene, ko hathakyiri buhere busana n'ebibi. Niikwa hali eririndirira omwubaha omusango n'omuliro owakalire, owakendisyaabuugha esyanzighu sya Nyamuhanga*" (Hebrania 10:23-27). Hathya thuthathungerera omo syanzumwa esi:

1. Thukatholera eribya bayiketherwa kusangwa thukakolerana n'oyuli muyiketherwa embere syethu.

2. Thukatholera ithwaghenda embere n'eribya bayiketherwa embere syithwibene nithwibene.

3. Isthwalekeranaya erihindana haghuma. Abandi kubabya bathya, n'omughulhu ono abaghuma bakaleka erihindana, muminye muthi ekyi s'isonda ly'omukama.

4. Thangabere ithutuyikirira abanyikyethu thuthi basyasa okw'ihindana thukabana ekyiro ky'omukama eky'eriyaramiryamo kyikayahika. Ekyi kyika-miinyisaya kyithi ithwayithekatherakyo. Thuwithe eyenga eyosi erikolha thuthya, obuli yenga.

5. Thukatholera ithubuka thuthi thwamakolha ebibi kandi ithwabiriminya okwenene, hakabya isihakyiri kyihongwa kyindi busana nethu, kandi isihali kyindi eky'erilindirira ghulhusiirweho olyan'eritswerwa n'erihera. Thwamathalhuka erihindana n'erithendikolha ebindu ebyothunasi ngoko thukatholera erikolha, neryo aho Omukama angathulhamya athi ithwe ithwabirimughana? Nokweryo, thukesyathoghotha thwamalholya embere thunemukolha thuthya.

Ebyosi nibuugha ambu omukama akalengekanaya athi thukendihiindana omo makanisa, kandi ni mubiiri w'eribya nagho, kandi ni mwatsi akalire, thwamathalhuka. Niikwa ni busana nakyakathulhaghira erikolha ekyi? Busana nakyi thuhindana? Hali nzumwa nene esireka. Thuthasamalira esyanguma kusyo:

1. Kusangwa thwabirikangirirbwa erikolha thuthyathukakangiriribawa

erikolha thuthya omwilhaghirwa kandi n’oby’erilhangirirako. Muthukasoma omo Hebrania 10:25 aho thulyakungawa erithendileka eriyahindana n’abandi. Neryo kandi thukasoma omo Emibiri 2:42 ngoko abikiiriirya abat-suka babya bakahindana busana n’eriramy, nomo Emibiiri 20:7 aho Paulo n’abikiiriirya ebe Trosi babya bakahindana oko kyiro ekyikatsuuka eyenga busana n’eriramy. Nethu kunakole thuthya.

2. Thuwithe erihindana busana n’eriramy Nyamuhanga. Kristo akathub-wira omo Yohana 4:23,24 ngoko Nyamuhanga akasonda abakamuramaya omo kwenene kandi ngoko Nyamuhanga nimulimu kandi ngoko thukathol-era erimuramy omo muliimu kandi n’omo kwenene.

3. Omukama akasonda ithwahindana imothwathoka erimwibuka erilhaba omw’irya oko meza yiwe. Paulo akakania oko mukonnga w’erirya oko ky-ihulho ky’omukama, akabuugha athi omugati niw’erirya busana n’eryibuka omubiri wa Kristo neryo n’olhuthehi nilw’erinywako busana n’eryibuka omu-sasi wa Kristo. (I Korinto 11:24,25). Thwangibuka omukama y’omo musindo ogho anzire ithwamwibukiramo, kandi isuthuthahiindana obuli kyiro ky’erit-suuka eyenga thukakolha thuthya?

4. Thukatholera erihindana imothwaka eriwathikya okwebyo ebithukabya ithwabiribana. Thwmathasyasuba omo I Korinto 16:2 thukasanga Paulo ak-abuugha athi thukatholera erihindana oko kyiro ekyikatsuuka eyenga imoth-wathoka erihithya ngoko thulyabana. Erisongyasongya lytheu likasosa lithi thwamathalhuka erihindana? Kwenene thwanganasyalethabyo omo kyindi kyiro ky’omukama ekyaha mbere, kwenene thukatholera erisyalettha thwam-abya ithulyathalhuka eriyahindana busana kusangwa myhakabya erilhwalha, n’ebindi, niikwa abangyi okwabo abakathalhuka eriyahiindana, bakaheraya omughisa ow’eriyahiithya nibya, isikyekyo kyisa, bakalholhaya embere ibane-thalhuka ngendo nene isibaleghene.

5. Omukama abirithulhagha athi akendisyabya nethu omw’ihiindana. Hulikirira edaghano yiwe: “aho babiri kutse basathu basyahindana omo li-ina lyaghe, nasyabya hayiima nabo” (Matayo 18:20). Ekyi kyisa kyikathol-era ikyathwanzisya erihindana obuli ok’obuli buhererya bw’ekanisa kusang-wa Omukama abirilhagha athi akesyabyaho. Sithwaghendire eriyahindana Omukulhu w’erihanga amabya inyakendisyaby’aho? Niikwa hano Omuka-ma iyuwene-wene athi akendisyabya nethu isi ngendo nguma niikwa obuli mughulhu. Kwenene sithutholere thukathalhuka eribererya erikokiibwa eriri ngeri kandi inyabirilhagha ngoko akesabyayo.

6. Thukatholera ithwanza eribya ok’obuli hindana busana n’ekyerilhan-giirako ekyo thukabya ithwama hiraho. Thuwithe abomo maka wethu, ebii-

ra, hayiima n’abandu bomo kyihugho erithwalira hayiima, abakabya ibana thusamalire. Bakathusamalira ng’ekyerilhangiriirako eky’erikwama, busana n’erisondolhwa. Thukayitsutsa eriminyerera ekyi neryo ithwakakamirirya eribasondolha omo nzira eyihikire. Erilhama lyabu kyangana kwamana n’emibiiri yethu omo musindo oghoghuthe wanga minya. Paulo mwasakangi-ra abanya Tesalonika: *“kandi mumwabya abakathukwama kandi n’akakwama omukama, busana n’eryangirira ekyiinywa omo bulhumi obunene, erilhaba omo mulimu abuyirre: imumwathoka eribya by’erilhangiriirako okwabo abikiikiiriraya omo Makedonia na Akia”* (2 Tesalonika 1:6,7). Thwanganabya eky’erilhangirirako, abandu bamathukwama kwenene-kwenenebakindibya ibakakwama Kristo? Thukatholera. Thukathekawa. Yitheke-theke erihindana ook’obuli lhihindano – hikirayo oko ndambi, ubye bukuthu n’eriyibombeka kwenene ramaya omukama.

7. Thuli b’erihindana esyombindano esyosi busana n’erisanga-sangana kandi n’erikulhakulhana, mundu mughughuma kandi n’ekyithunga ekyosi. Abikirirya bamathendibya bakahindana, neryo ekanisa yikendisyasiika yithi yikabya n’erilhangirika embere sy’abandu bomo bulhambo yirimo? Ahathe erihindana abikiiriirya sibangaminyana, sibangaminyana amaka bawithe, sibanga theka-theka, mubiiri, oghundi syangawathikya oghundi, kandi sibangahiranamo omuhwa. Omo mwatsi oghundi, omubiri omunene w’ekanisa, amani wayo, obuhererya bwayo, n’ebindi, bikakwamana n’erihinda-hiindana. Kwenene, ahathe ebyi neryo ekanisa yikendikwira ighuma. Busana nekyi, mukasoma omo ndaghano nyihya-nyihya oko hinda-hindana ly’abikiiriirya kando obuli mughulhu aho Paulo n’abandi bakwenda baghenda ibakasanga-sangana n’abikirirya. Thusasoma ambu n’omo mughulhu w’eryendereriibwa ngoko abikiiriirya ibakathunga omughisa ow’erihindani-ramo. Namunabwire kokyine kyithya kyamubongo erihindana busana n’eriramyanya kandi n’erikolha omubiiri w’omukama.

Ebi by’ebike oko nzumwa esyangaleka ithwahindana omo ndeko sy’ekani-sa. Ghukatholera iwaminyana ghuthi erihindana lyethu isiryimanira oko bulengekania obw’erihindana ngendo nguma omo mughesera kutse erithwalha mughulhu muli imuthwathasya hindana., liriryo thukathoera eribya thuka-hiindana obuli kyiro ekyikatsuuka eyenga kutse obli mugulhu ekanisa yikayitsutsa thuihindane. Amasako akabuugha athi, “ahathe erihinda-hindana lyethu.” Omo mw’omuli erisanga-sangana eryosi aho thukasonda erihinda-hindanira. Omukama athuwathikaye erihira omuhwa w’omw’iramyanya omo ngebe syethu imothwathoka eriba bayiketherwa biwe omwihindana ly’ekanisa. Thukendibya thwamabya bayiketherwa embere syiwe omo musindo oyu, ithukendibya bayiketherwa n’omo aindi nzira.

EBIBUULYO

1. Ni kyabulighe kyahi ekyilhabire oko bindi omwithalhuka eky'omwikii-riirya angakolha?
 2. Omwikiririrya anganabya muyiketherwa kandi akabya isyalihiindana omw'indanaly'ekanisa?
 3. N'ihindana lyahi ery'engendo ibiiri abandu bomo bisomo bangyi bak-aghendamo omo mwaka?
 4. Thonda ebyo abikiiriirya bakayihambuulhayamo busana n'erithalhuka eriyahiindana okwiramya.
 5. Kyinanguhire omwikiririrya eriramirya omoka yiwe omo kyitswa ky'eri-yaramirya oko kanisa n'abandi?
 6. Imwikiririrya w'okwenene anatholere inyayisunza ekyi?
 7. Ni mughulhu wahi ow'omwikirirya angikiiriiribwamo erithendiya hiin-dana n'abandi omwiramya?
 8. Thangakangania nga kyikamiinyisaya kyi eribya isiwangathoka erihin-dana n'abandi ighunikiriribirwe.
 9. Soma Hebrania 10:23-27.
 10. Busana nakyi thukatholera eribya bayiketherwe embere sy'omukama?
 11. Erisighania esyambinda-hiindano kyikamiinyisaya kyi?
 12. Omwikiiriirya angibukya athi munyikiyiwe emibiiri y'eriyaramya?
 13. Ekyiro kyikayahika, omo Hebrania 10:25 nikyahi?
 14. Thonda ebikendisyabya okwa'abo abakabihaya ibananzire.
 15. Hererya esyanzumwa esikaleka ithwahindana omo kanisa.
 16. Hereraya eby'erilhangiriirako bibiri abiikiiriirya abatsuuka ibanemuhi-indana.
 17. Ekyilhubirirya ekyikulhu eky'erihindana omwiramya ni kyahi?
 18. Thwangibuka Kristo ngoko alhaghira thwamathalhuka erighenda ok-wiramya?
 19. Thwangakolka kyahi okwihiithya lyethu thwamayisanga ithwabir-ithalhuka okwihindana?
 20. Oyuwabuugha athi akendisyabya nethu omwihiindana nindi?
 21. Omukama akendisyabya nethu mughulhu wahi?
 22. Thakania ok'obukulhu bw'ekyerilhangirirako omo mwatsi w'eriramya.
 23. Erihiindana lyethu liseghemire oko kyi?
- Enduuli.